

Lwisukha: Bible for Yohana.
Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Yohana.

1

¹Muliranga likhuva lialiho, khandi likhuva liali na nyasaye, khandi likhuva liali nyasaye. ²Nindio khandi kali muliranga lia nyasaye. ³Shia shindu shiosi shialomwa naye, shindu shivulakhuho khali shilala shialombwa vuchila ye khulomba. ⁴Khuvirila muye vulamu vwaliho, khandi vulamu vwali vulavu vwa vandu. ⁵Vulavu vwakhanga mushisundi, navutswa shisundi shishiali ni tsingulu tsu khukura vulavu. ⁶Nyasaye yaruma murumwa wewe walangwangwa yohana. ⁷Naye witsa khuli mushahidi, khuva mushahidi huvulavu khu vandu vosi kuvirila muye vatushi khusuvila. ⁸Ye mweneshiyali vulavu tawe, navutswa yitsa kuhana vushahidi khu vulavu. ⁹Yuvu vwali vulavu vwatoto vulavu vwashila shia mundu wosi witsanga mushivala. ¹⁰Yali mushivala makhandi shivala shialombwa naye navutswa shivala shishiali shia mumanya tawe. ¹¹Yitsa khulitsa lielie mwene navutswa vahndu veve mwene vambakhana khumwinjilitsa. ¹²Navutswa valala khuvo vamwinjilitsa nivasuvila muye yavaha vunyali vu khuva vana va nyasaye. ¹³Shhvitsa khuva vana va nyasaye kuvirila mulivulwa liu mmbili tawe noho kuvirila mulivulwa khuli vana vu mundu musatsa tawe, navutswa nyasaye mwene naye wali tata wavo. ¹⁴Likhuva lialombwa vuyiakha manilimenya mukhutsi yitsula tsimbavasi nende katotokhwalola vukhumi vwevwe, vukhumi vwa yali nanyoli khuli mwana mutelwa wavula khu tata. ¹⁵Yohana ya hana vushahidi khuye yilwatsa navola, uyu naye wanalomoloma makhuva khulondokhana khuye lwa navola, mundu ulitsa khwitsa inyuma wanje naye uli nu vunyali vunyishi khumbira shichila yaliho nishili khwivulwa. ¹⁶Khulwa yako, kuvirila khu tsimbavasi tsietsie tsinyishi wakhukasitsa khutsi vosi khandi akhukasitsanga shia litukhu. ¹⁷Nyasaye yahana malako kuvirila khu musa navutswa tsimbavasi nende katoto kalolekha kuvirila mu yesu kristo. ¹⁸Mundu avulakhuho walola khu nyasaye navutswa mwana wewe mutelwa, uli khuli nyasaye khandi uli khuluveka lwa tata wamulomba khumanyikhana. ¹⁹Yako nako katoto kayahana, lwa vimilili va vayahudi mu yerusalemi varuma vasalisi valala nende vandu vulwivulu lwa levi khu mumureva, "uli vina?". ²⁰Yohana shiyambakhana khu vachipa tawe navutswa yalomoloma havulavu navola shindi masiha tawe. ²¹Vamureva unyala khuva uli vina? unyala khuva uli Eliya? yachipa shindi Eliya tawe vareva khandi unyala khuva uli muprofeti? yachipa shindi muprofeti tawe. ²²Nalwo lwa vamureva, " khuvolele uli vina? khuhe shia khutsia khuchipa vandu vakhuruma ni shina shiunyala khuvolakhu yivi mwene. ²³Yachipa narumishila makhuva ku muprofeti isaya yali niyavola ninzi mwoyo ku mundu ulanjililanga mushiangalangwi lunjishitsi injila yu mwami. ²⁴Varumwa va vafarisayo, navo varumwa. ²⁵Vareva, niva shiuli masiha inoho Eliya, inoho muprofeti, shichila shina ubatisanga vandu? ²⁶Yohana yachipa"mbatisanga na matsi navutswa mundu mulala usinjili mu munyi wa mwakorwa. ²⁷Naye witsanga inyuma wanje, khandi mbulakhu vunyali vu kuvoholola vilaro vievie". ²⁸Yaka kosi kikholekhanga mu litaala lia Betsania ihale khurula mu muchela kwa yorodani wa Yohana yavatisanga vandu. ²⁹Litukhu lialondakhu Yohana yalola Yesu niyitsanga yhimbi ha yali nali, navola" loli shimeme shi likondi shia nyasaye shirulitsaho vwoni vwa vandu vosi mushivala, ³⁰Uyu naye wanalomoloma makhuva khulondokhana khuye, lwa navola mundu witsanga inyuma wanje , ali nitsingulu tsinyishi khumbira shichila yaliho nishili khwivulwa. ³¹Inzi mwene nali namukorwa, navutswa yitsa nambatisa na matsi khu amanyikhane khu vaisraeli. ³²Yohana yahana vushahidi yuvu navola, nalola Roho niyikhanga khurula mwikulu khuli shituti nayela khuye. ³³Inzi mwene nali namukorwa, navutswa nyasaye wanduma mbatisi na matsi, yambolela' mundu wa nulole Roho nayelanga khuye khandi, nishiva khuye naye ubatisanga na Roho mutakatifu' ³⁴Mali kuvola khandi mbananga vushahidi ndi uyu naye mwana wa nyasaye." ³⁵Litukhu lialondakhu Yohana yali nasinjili hawenaho na vechi vavili khu vechi veve. ³⁶Lwa yalola Yesu nachendanga, yavola loli shimeme shi likondi lia nyasaye. ³⁷Lwa vechi venavo vahulila navolanga ario valonda Yesu. ³⁸Yesu yishevukha navalola nivamulondanga , navareva" ni shina shia mukhavanga? vamuchipa Rabbi[kavolanga mwechitsi] ni hena ha umenyanga? ³⁹Yesu yavavolela hambi mulole ,vasimukha nivatsia khulola havundu ha yamenyanga, nivamenya naye khu litukhu lienelo hichila tsiali nitsili tsisa likhomi tsiukhulukolovo. ⁴⁰mulala khu vechi vavili yavo wali nahulili makhuva ka Yohana yali nalomolome yalonda Yesu naye nali Andereya amwavo Simoni Petro ⁴¹Andereya yasimukhu vwangu natsia khukhava amwavo wewe Simoni, namuvolela khunyoli masiha kavolanga kristo. ⁴²Andereya yavukula Simoni namuhila khu Yeu, yesu namuhenza navola lira liolio ni Simoni mwana wa Yohane ,navutswa utsitsanga khulangwa Kefa kavolanga lichina. ⁴³Litukhu lialondakhu yesu yakanakana khutsia mu lusomo lwa Galilaya. yakana naa Filipu namuvolela nonda. ⁴⁴Filipu yarulanga mu litala lia Betsaida wa Andereya nende Petro vamenyanga. ⁴⁵Filipu yanyola Nathanieli namuvolela khunyoli woyo wa Musa yahandika makhuva khulondokhana khuye mushitabu shia malako, khandi wa vaprofeti vahandika makhuva khulondokhana khuye, naye nali yesu mwana wa yosefu, khurula mulitala lia Nazareti. ⁴⁶Nathanieli yareva"toto shindu shilayi shinyala khurula mulitala lia Nazareti?"Filipu yamuvolela "hamba ulole' ⁴⁷lwa yesu yalola Nathanieli niyitsanga himbi naye, yalomoloma khuye navola" uyu naye muisraeli watoto, vuveyi vuvulakhu muye. ⁴⁸Nathanieli yamureva" wamanya munjila shina?yesu yamuvolela nakhulola yivi nende Filipu, nuli hasi wu musala kumukhuyu nishilin khukhulanga. ⁴⁹Nathanieli yamuvolela khandi mwechitsi uli mwana wa nyasaye uli mwami wa israeli. ⁵⁰Yesu yamuchipa navola, unyal khuva usuvili lwa kuvolele khuloli nuli hasi wu musala ku mukhuyu. ulitsa kuvola vindu vikali kuvira vienevo. ⁵¹Yesu yavavolela, muvolelanga katoto mulitsa khulola likulu nilimali khwikha, khandi tsinjelosi tsia nyasaye ni tsitsitsanga ikulu khandi nitsikhanga hasi khumwana wu mundu.

2

¹Litukhu lia khavaka, khwali ni shiselelo shiu khuhilane mulitala lia kana, lili mu lusomo lwa galilayo mama wa yesu yaliho. ²Yesu nende vechi veve khandi va valanjilwi vali mushiselelo shiu khuhilana shienesho. ³Khandi lwa venya idivai, mama wa yesu yavolela yesu, " idivai yavo ivwele". ⁴Yesu yamuvolela, mukhali yivi, nivi unyala khumbolela kakhola? isaa yanje ishili khutukha. ⁵Mama wa yesu yavolela varumishi, kholi shia shindu shiosi, shia amuvolela mukhole. ⁶Khwaliho nitsinyungu sita tsia matsi shia indala tsikalani makhomi kavili natsindi makhomi kavaka khulondokhana khu mulukha kwa vayahudi vakholanga ku khwinihitsa. ⁷Yesu yavavolela, yitsulitsi tsinyungu yitsi na matsi navo varamu matsi khutukha lwa kitsula mutsinyungu tsienetso. ⁸Khandi yavavolela, tehikhu matsi matimukahili khu mundu wusinjlilanga mulukha kwenuku navo vamanya vakhola vario. ⁹mundu walinasinjlili mulukha kwenoko yang'wakhu matsi kenako shiyamakhu ha kali nikaruli tawe.[navutswa varumishi vali nivatehi vamanya] nalwo lwa yalanga musatsa uselelanga mwiha. ¹⁰Namuvolela" mundu wosi aranga ahana idivai indayi.vacheni nivakhang'wa nivakhikura khu alera ikhali indayi tawe nikhali yivi umali khuvikha idivai indayi khutukha nunundi. ¹¹Yishi shiali shiloleshitso shiukhuranga shia yesu yakhola mu shiserelo kana mu lusomo lwa Galilaya wa yamanyinya vukhumi, vwevwe ma vechi veve nisuvila muye. ¹²Inyuma wa yaka yesu, nende mama wewe, vamwavo veve, halala na vechi veve vasimukha nivatsia kaperenamu wa vamenya matukhu mati. ¹³khandi mulukha kwa pasaka kwali nikuli himbi khutukha yesu yasimukha natsia yerusalemi. ¹⁴yanyola vakulitsi vi tsing'ombe, makondi, nende vituti, khandi vakalukhanyinyi vi tsisenti nivikhale mutsimesa tsiavo mulitempeli. ¹⁵yalomba shivoko khurula khu mikoye nakhunga miruku chiosi khurula mulitempeli khali makondi nende tsing'ombe, ma natikalitsa tsimesa tsia vakalukhanyinyi vi tsisenti nasalanyinya tsisenti tsiavo. ¹⁶khu vakulitsi vi vituti yavavolela "rulitsi vindu yivi yaha. leshi khukhola inzu ya tata wanje khuva musokoni. ¹⁷vechi veve vitsushitsa ka mahandiko matakatifu kavolanga vuyanji vwanje shichila inzu yoyo vwakhanga mwinzi khuli mulilu. ¹⁸vimilili va vayahudi vamureva nishiloleshitso shina shiaunyalala khukhola khumanyinya uli nuvunyali vu khukhola vindu yivi? ¹⁹yesu yavachipa" pomoli litempeli yili ninzi nava niliumbanga khu matukhu kavaka. ²⁰khulwa yako vayahudi vamureva, litempeli yili liavukula mihika makhomi kane na sita kumbakha, nivi unyala khumbakha khu matukhu kavaka? ²¹Navutswa litempeli lia lomolomakhu kwali muvili kwekwe. ²²Lwa yesu yisimukha khurula mulikhutsa, vechi veve vitsushitsa yali wavavolela ario. vasuvila mu mahandiko matakatifu nende makhuva ka yesu yali navoli. ²³Lwa yali nali yerusalemi khulitukhu liu mulukha kwa pasaka vandu vanyishi vasuvila muye lwa valola viloleshitso vinyishi via yali nakholi. ²⁴Navutswa yesu shiyali niyavasuvila muvo tawe, shichila yali wamanya vandu venavo vosi. ²⁵shiyenya mundu wosi khumuvolelakhu shindu khulondokhana khuvo tawe, shichila yali wamanya kali mu mioyo chiamo.

3

¹khwaliho nu mundu mufarisayo walangwangwa Nkodemu mwimilili wa vayuda. ²yatsia khu yesu mu vutukhu namuvolela"Rabbi, khumanyi uli mwechitsi khurula khu nyasaye.mundu avulakhuho unyala khukhola viloleshitso via yivi ukholanga, nyasaye nakhavale naye tawe. ³Yesu yamuchipa "khuvolelanga katoto mundu nashili khwivulwa lwa khavili shianyalala khwinjila mu vwami vwa nyasaye tawe. ⁴Nicodemu yamureva "munndu yakhivulwa munjila shina nyahindila khale? katoto shianyalala khwinjila munda mwa mama wewe nu khwivulwa lwa khavili tawe. ⁵Yesu yamuchipa, "khuvolelanga katoto nashili khwivulwa khuvirila khu matsi nende Roho, shianyalala khwinjila mu vwami vwa nyasaye tawe. ⁶Mundu yivulwangwa nu mundu, navutswa mundu wivulwi na Roho ni wa Roho. ⁷Uvuli khunjeyela lwa mbolanga kenyekhanga wivulwi khandi lwakhavili. ⁸Imbutsa ihutsanga havundu ha yenyi, unyala khuhulila khuli ihutsanga, navutswa shiunyalala khuvola wa irulanga noho ha itsitsanga tawe, nindio khandi kali kario khu mundu wivulwa na Roho. ⁹Nicodemu yamuchipa khandi yamureva' kanyala khwikholekha kari?' ¹⁰Yesu yamuchipa,"mwechitsi mukali wa israeli, navutswa shiumanyi makhuva yaka tawe? ¹¹khuvolelanga katoto khulomolomanga makhuva ka khwamanya, khandi khuhananga vushiahidi khulondokhana ka khwalola navutswa shiuvukulanga vushiahidi vweru tawe. ¹²Niva muvolelanga makhuva khuvindu vikholekhanga khulilova khunu navutswa shimusuvilanga tawe munyala khusuvila muri niva nyala khumuvolela makhuva khu vindu viu mwikulu? ¹³Mundu avulakhuho watsiakhu mwikulu, nikhali mwana wu mundu warula mwikulu makhandi nakalukha mwikulu. ¹⁴Khuli musa yachingula ikulu inzukha khu mu shiangelangwi, nindio khandi mwana wu mundu alitsa khuchingulwa. ¹⁵Mundu wosi umusuvila avuli khutiva, navutswa ave nende liva mwoyo. ¹⁶shichila nyasaye yayanza vandu vu mu shivala nahana mwana wewe mutelwa, khu mundu asuvila muye alivila khutiva navutswa alinyola vulamu vwi liva mwoyo. ¹⁷Nyasaye, shiyaruma mwana wewe mushivala khwitsa khukhalachila shivela tawe, navutswa khuvahonyinya khuvirila khuye. ¹⁸Woyo usuvilanga muye, shianyalala khukhalachilwa tawe, navutswa woyo wambakhananga khusuvila muye, wamala khukhalachilwa khale, shichila wayambakhana khusuvila mu mwana mutelwa wa nyasaye. ¹⁹Nindio likhalachilwa lilita khwikholekha shichila vulavu wamala khwitsa mushivala, navutswa vandu vayanza shisundi khuvira vulavu, shichila vikholwa viavo nivitamanu. ²⁰Navutswa mundu ukholanga vindu vitamanu wayambakhana vulavu, khandi shianyalala khwitsa muvulavu shichila shiyeniyi vikholwa vievie vimanyikhane tawe. ²¹Navutswa mundu ukholanga katoto alolekhanga muvulavu khu kamanyikhane havulavu vikholwa vievie viloleshe kuhana lyali khu nyasaye. ²²Matukhu mati nikakhavira, yesu nende vechi veve vasimukha nivatsia mulusomo lwa Yudeya ha vamenya navo khu matukhu mati makhandi nabatisa. ²³Yohana yali nabatisanga vandu havundu halangwangwa Aenoni, himbi mulitala lia Salimu shichila khwaliho na matsi manyishi. vandu vatsitsanga khuye navabatisa. ²⁴Yohana yali nashili khuvowa muchela. ²⁵Valala khu vechi va Yohana, varanga khuhangalitsana mulilomoloma na vayahudi khulondokhana khu mulukha ku khunihitswa. ²⁶Khulwa yako, vechi venavo vasimukha nivatsia khu Yohana, nivamuvolela mwechitsi mundu wali nivi khuluchinga lwa yorodani wahana vushiahidi

khulondokhana khuye khandi abatsanga vandu nunundi, khandi vandu vosi vatsitsanga khuye.²⁷Yohana yavachipa khandi navavolela, mundu avulakhuho unyala khunyola shindu nakhahelelwi khurula mwikulu.²⁸Munyi vene muli vashiahidi vanje lwa navola shindi masiha tawe navutswa narumwa khwitsa imbela wewe.²⁹Musatsa uselelanga mwiha, naye mwene mwiha, navutswa mulina wu musatsa uselelanga mwiha asinjlaho ahulili ka vavolanga, khndi asangalanga lwa ahulilanga musatsa uselelanga mwiha nalomolomanga, nindio khandi inzi ndi nuvuyanzi vwatoto.³⁰Kenyekhanga ave ikulu ninzi njehe.³¹Woyo yarula mwikulu ali nuvunyali khu viosi na oyo warula khu lilova ni lilova khandi alomolomanga ku khwilova . navutswa yarula mwikulu ali nuvunyali khu voisi.³²Khandi kayalola nende kayahulila ahananga vushiahidi, makhandi avulakhuho mundu wosi ahuchililanga vushiahidi vwevwe tawe.³³Mundu ahuchililanga vushiahidi vwevwe amanyinyanga ni kilikali nyasaye ni watoto.³⁴Mundu wa nyasaye mwene yaruma alomolomanga makhuva ka nyasaye.shichila nyasaye amuhetsanga mu vunyishi tsingulu tsia Roho.³⁵Tata wayanza mwana wewe, khandi wamuha vunyali khusinjlila shia shindu shiosi.³⁶Mundu usuvilanga mu mwana, ali nu vulamu vwi liva mwoyo. mundu wambakhananga khusuvila mu mwana, shialitsa khunyola vulamu tawe, navutswa nyasaye alatsilila khumulolela vurima.

4

¹Nalwo lwa mwami yamanya yahulila likhuva vafarisayo vavolanga yesu anyolanga valondi vanyivanyishi khandi abatisanga vechi vanyishi khuvira yohana.²Khali niva yesu mwene shiyabatisanga tawe vechi vonyene, navo vabatisanga.³Yarula mulusomo lwa yudea nakalukha khandi mulusomo lwa Galilaya.⁴Khandi kenyekha mbaka avirili musamaria.⁵Khulwa yako, yatukha mulitala lia samaria havundu halangwangwa sikari, himbi khu mulimi kwa yakobo yali ni yaha mwana wewe yosefu.⁶Shisima shia yakobo shiali shiayelwa mulit6ala lienelo lwa yesu yavwa tsingulu shichila luchendo, yikhala himbi ha shisima shienesho tsiali himbi tsisaa sita tsiu mbasu.⁷Mukhali musamaria yiasi khuteha matsi, yesu namuvolela, "mbekhu matsi ku khungwa ".⁸Vechi veve vali vatsili mulitala khukula shiukhulia.⁹Mukhali musamaria mwenoyo yamuvoleda uli muyahudi ninzi ndi mukhali musamaria. undevanga matsi ku khung'wa munjila shina? vayahudi shivahambananga na vasamaria mulikhola liavo tawe.¹⁰Yesu yamuchipa namuvolela, uvanumanyikhu shihanwa shia nyasaye ahananga , mundu ukhurevanga matsi ku khung'wa, wakhamurevi naye yakhakhuhele matsi kahananga vulamu.¹¹Mukhali mwenoyo yamuvoleda" mwami uvula shindu shiukhutehelakhu, khandi shisima hishi shitsia hasi muno. nihena ha unyola matsi kahananga vulamu? ¹²uli nuvunyali khuvira kuka weru Yakobo wakhuha shisima yishi, shichila khali ye mwene yang'wetsamu halala na vana veve nende tsing'ombe tsietsie.¹³Yesu yamuchipa " shia mundu wosi ung'waku alatsilila khuva nu vuluhu. ¹⁴Navutswa mundu ung'waku matsi kanzitsa khumuha shianyala khutsilila khuva nuvuluho tawe, matsi kanzitsa khumuha kalitsa khuva muye, khuli shirula hia mati kahananga vulamu vwi liva mwoyo.¹⁵mukhali mwenoyo yamuvoleda, mwami mbekhu matsi kenako khu mbuli khutsilila khwitsa khuteha hanu. ¹⁶Yesu yamuvoleda rula hanu tsia uvoleda musatsa wowo mwitsi naye hanu.¹⁷mukhali mwenoyo yachipa Yesu mbula musatsa. yesu yamuvoleda uvoli katoto uvula musatsa. ¹⁸shichila wali wahilwa na vasatsa varanu. khandi ni kilikali musatsa wa uli naye nunundi shiali musatsa wowo tawe. uvoli katoto.¹⁹mukhali mwenoyo yamuvoleda"mwami mali khulola uli muprofeti. ²⁰vakuka veru vasalilanga khu shikulu yishi, navutswa munyi vayahudi muvolanga Yeruselemi, naho havundu ha vandu venyekhanga vatsi khusala khu nyasaye.²¹Yesu yamuvoleda, " mukhali yivi suvila mwinzi, isaa ilita khutukha lwa vandu valitsa khuvula khusala khutata khu shikulu yishi noho mu yeruselemi noho khusikamira tata. ²²Munyi musikamiranga wa mukhamanyi khwamanya wa khusikamiranga lihonyinywa nilia vayuda.²³Navutswa isaa itukhanga khandi nayo iyi, vasikamira nyasaye mukilikali valasikamira tata muroho nende kilikali tata yenya vandu vario khumusika. ²⁴Nyasaye ni roho, khandi vandu vasalanga khuye, khutukha vasale khuye khuvirila mu roho khandi munjila yatoto.²⁵Mukhali mwenoyo yavola, manyi masiha ulangwangwa kristo alitsa khwitsa, alitsa khukhuvoleda shia shindu shiosi. ²⁶Yesu yamuvoleda inzi ulomolomanga khuyivi, ninzi ye.²⁷Isaa yeneyo, vechi va yesu vakalukha, navo vali nivilichenya lwa vamunyola nalomolomanga nu mundu mukhali navutswa avulakhuho khali mulala khuvo wamureva, shichila shina ulomolomanga naye²⁸Mukhali mwenoyo yalekha inyungu ya matsi, nakalukha mulitala, navolela vandu viweneyo. ²⁹Hambi mulole mundu umbolele shia shindu shiosi, shia nakholanga anyala khuva naye kristo? ³⁰Navo varula mulitala lienelo, nivatsia khumulola.³¹Mutsisa tsienetso, vechi vamuhomba nivavola mwechitsi liakhu shiukhulia shitititi. ³²Navutswa yavavolela, ndi nende shililwa shukhulia shia munyi mukhamanyi. ³³Khulwa yako vechi veve varanga khurevana vene, kanyala khuva mundu umulerele shiukhulia?³⁴Yesu yavavolela, shiukhulia shianje nu khukhola lienya lia woyo wanduma, khandi khuvweshitsa muhinzi kwekwe kwa yamba. ³⁵Muli ni livola chirikale mieli chine khutukha khu lichesa navutswa muvolelanga mukenyekhu vulahi mu milimi, virakwa viakhomela khandi viayirechekha khucheswa. ³⁶Muchesi achesanga ahelwanga murungu khandi avunjelitsanga virakwa viachesi shichila vulamu vwi liva mwoyo khu murachi nende muchesi nivikhonyele halala.³⁷Livola yili ni liatoto, mundu mulala arakanga, na wundi achesanga. ³⁸Mali khumuruma khutsia khuchesha mu mulimi kwa mwakharaka mu, vandi vakhola muhinzi mu mulimi kwenoko numunyi munyola vukhala mu muhinzi kwavo.³⁹Vasamaria vanyishi khurula mulitala lienelo, vasuvila mu yesu, shichila mukhali musamaria mwenoyo yali uvavolele, ambolele shia shindu shiosi shia na khola. ⁴⁰Lwa vasamaria vatsia khu yesu, yamuvoleda amenye navo, ma yesu namenayayo khumatukhu kavili.⁴¹Khandi vandu vanyishi vasuvila shichila likhuva lia yesu yali navoli. ⁴²Navo vavolela mukhali mwenoyo, shikali makhuva kukhuvoleda, nako kachilanga nu khusuvila tawe, navutswa khutsi vene khumali khusuvila khu kaye mwene avoli khandi nikilikali khumanyi naye muhonyinyi wa vandu mushivala.⁴³Matukhu kavili nikakhavira, yesu yarulayo,

natsia mulusomo lwa galilaya. ⁴⁴Yesu mwene yali uvoli, muprofeti shianyala khuhelwa luyali na vandu vu mushivala shieshie tawe. ⁴⁵Lwa yesu yatukha mulusomo lwa galilaya, vagalilaya vamwinjilitsa vulayi, shichila vosi vali vamanyi shia shindu shiosi shia yali nakholi mu yerusalemi khu litukhu liu mulukha kwa pasaka khandi vo vatsia mulukha kwenoko. ⁴⁶Yesu yakalukha mulitala lia kana lili mulusomo lwa galilaya wayakalukhanyinya matsi khukwa idivai mulala khuvimili va vayahudi yali naliho, wu mwana wewe yali nalwalanga mulitala lia kaperenamu. ⁴⁷Lwa mundu mwenoyo yahulila, yesu aruli mulusomo lwa galilaya, yasimukha natsia khuye, namuvolela atsi mulitala lia kaperamu kuhonyinya mwana wewe wali nali himbi khukhutsa. ⁴⁸Yesu yamuvolela, mundu avulakhuho khali mulala khumunyi, unyala khusuvila nakhaloli viloleshitsu nende vindu viu khuchenyinya. ⁴⁹mundu mwenoyo yavolela yesu mwami, hamba khutsi nivi mwana wanje nashili khukhutsa. ⁵⁰yesu yamuvolela, " rula hanu utsi mwana wowo alahona .mundu mwenoyo yasuvila mumakhuva ka yesu yamuvolela nalwo lwa yarulaho. ⁵¹Lwa yali nali khu makhanda vavumishi veve vamwakanila, nivamuvolela, mwana wowo uhoni. ⁵²Khulwa yako, mundu mwenoyo yavareva isaa yu mwana wewe yali nahoni nivamuvolela, "ahoni tsisa saba mukolovo. ⁵³Tata wu mwana mwenoyo yitsushitsa nakumbuka nayo isaa ya yali namuvolele, " mwana wowo uhoni ye nende vandu vosi vi inzu yeye vasuvila. ⁵⁴Yishi nashio shiali shiloleshitsu shia khavili shia yesu yakhola niyakharula mulusomo lwa yudeya khutsia mulusomo lwa galilaya.

5

¹Kenako nikakhavira, yesu yatikulukha natsia yerusalemi wakhwali nende mulukha kwa vayahudi. ²Khwali nende litavalia lia matsi mu yerusalemi mwenomo himbi ni shilivwa shia makondi, liali liatilwa ni tsirilu tsiranu, lira lindi muluhebrania ni betsezatsa. ³Shituma shikali shia vandu vali nivalwala, vavekhu, valwma, nende vafwokoya vamenyanga mu tsirilu tsienetso, nivalindililanga matsi kalenjele. ⁴Shichila shia khase khosi, injelosi yu mwami yatsitsanga halitavalia lia matsi kenako khutuvulanyinya mulwale wu khuranga witumbulanga mumatsinikakhatuvukha, yahonanga khurula mu vulwale vwevwe vwosi. ⁵khwali nu mundu halitavalia henaho wali niyalialwala vulwale khu mihika makhomi kavaka na munane. ⁶Lwa yesu yamulola nakoniho, yamanya ni mundu wali niyalwala khumihika minyishi yamureva, wenyanga uhone? mundu wali niyalwala mwenoyo yamuvolela mwami mbulakhu mundu unyala khumbila mu litavalia lia matsi yili, lwa matsi kavetsanga nikakhatuvukha lwa njelitsanga khukwamu mundu wundi aranganga khitumbulamu ninzi nishili. ⁸Yesu yamuvolela, sinjila vukula shitali shioshio uchende. ⁹Mundu wali niyalwala mwenoyo, yahona vwangu navukula shitali shieshie naranga khuchenda, makhuva kenako kikholekha khu litukhu li sabato. ¹⁰Vayahudi yavolela mundu wali nahonyinywi, litukhu linu ni litukhu li sabato shikenyekhanga khuchinga shitali shioshio tawe. ¹¹Mundu mwenoyo yavachipa, mundu umbonyinyi ambolele vukula shitali shioshio uchende. ¹²Navo vatureva, "nu mundu shina wakhuvolela vukula shitali shioshio uchende?" ¹³Navutswa woyo wali nahonyinywi shiyali namanyi mundu wali namuhonyinyi tawe shichila yesu yali aruli havundu henaho ni shituma shikali shia vandu valiho. ¹⁴Nikakhavira matukhu mati, Yesu yanyola mundu mwenoyo mu litempeli, namuvolela lola uhoni nunundi lekha na wvoni, khu shindu shitamanu shivuli khukhukwila. ¹⁵Mundu mwenoyo yarulaho, natsia khuvolela vayahudi Yesu naye wali namuhonyinyi. ¹⁶Vayahudi varanga khutambitsa Yesu shichila yakhola shikholwa shienesho khulitukhu li sabato. ¹⁷Yesu yavavolela, tata wanje wamenya shia khase khosi nahinzilanga khali khutukha nunundi khali inzi mbinzilanga khandi ndio. ¹⁸vayahudi vakhava khuli vanyala khumwira, shichila yameneka malako ki litukhu li sabato konyene tawe, navutswa yali uvoli khandi nyasaye ni tata wewe, khwilekhanyinya mwene khu nyasaye. ¹⁹Yesu yavavolela, muvolelanga killikali mwana avulakhu vunyali vukhukhola shindu shiosi khuvirila khu tsingulu tsietsie mwene navutswa a shindu shisi shia tata akholanga nashio shia mwana akholanga. ²⁰Tata wayanza mwana khandi amumanyinyanga shia shindu shiosi shia ye mwene akholanga. alitsa khumumanyinya vindu vikali viene viu khukhola khuvira yivi, khu vosi muliva nilichenya. ²¹Khulilwa tata yisimushitsanga vandu vakhutsa, avaha vulamu, nindio khandi mwana ahetsanga vandu vayanizitswangwa navo vulamu. ²²Tata shiakhalachilanga mundu tawe, navutswa waha mwana wewe vunyali vwosi vukhukhalachila vandu. ²³Vandu vosi vahe mwana luyali, munjila indala yeene khuli vahetsanga tata luyali mundu wambakhananga khuha mwana luyali shiahetsanga tata wamuruma luyali tawe., ²⁴Muvolelanga kilikali mundu uhulilanga likhuva lianje, khandi suvila mu woyo wanduma, ali nu vulamu vwi mihika ni mihika mundu khuli mwenoyo shialitsa khukhalachilwa tawe, navutswa wanyola vulamu shichila wakura likhutsa. ²⁵Muvolelanga kilikali isaa ilitsa khutukha khali yatukha khale, lwa vandu vakhutsa khale valitsa khuhulila mwoyo ku mwana wa nyasaye yavo valitsa khukuhulila valitsa khutsililila khuva mwoyo. ²⁶Khuli lwa tata ali nu vulamu muye mwene khandi walomba mwana wewe huva nu vulamu muye mwene. ²⁷Khandi waha mwana vunyali vu khukhalachila vandu, shichila khali naye nu mwana wu mundu. ²⁸Mukhachenyinywa na makhuva yaka tawe shiehila isaa ilitsa khutukha lwa vandu vakhutsa vosi, valitsa khurula muvilindwa viavo. ²⁹Yavo vali nivakhola malayi, valitsa khwisimukha khurula mu likhutsa khandi vatsilili khuva mwoyo navutswa yavo vali nivakhola vindu vitamanu valitsa khwisimukha khurula mu likhutsa nu khukhalachilwa. ³⁰Mbulakhu shianyala khukhola mwene khuvirilakhu vunyali vwanje khalachilanga vandu khuli tate wanduma ambolelanga. ³¹Niva nyala kuhana vushiahidi khulondokhana khwinzi mwene, vushiahidi vwenovo shivunyala khuva vwatoto tawe. ³²Navutswa khuli nu wundi umbanilanga vushiahidi ni limanya avolanga katoto khulondokhana khwinzi. ³³Yaruma likhuva khu yohana, nahana vushiadi khulondokhana khu katoto. ³⁴Shimbuchililanga vushiadi vwa vandu tawe navutswa mbolanga makhuva yaka, khumuha nyinywi. ³⁵Yohana yali khuli itaha yakhang, nikholitsa vulavu, khandi mwikhoyela mu vulavu vwevwe. ³⁶Navutswa vushiahidi vwandi navwo khwinzzi mwene, nu vwiwtsingulu muno khuvira vwa yohana, shichila mihinzi milala chia kholanga chihnanga

vushiahidi havulavu, tata naye wanduma.³⁷ Tata wanduma, naye uhananga mwene vushiahidi khwinzi mushili khuhulilakhu mwoyo kwekwe noho khuli asesanga.³⁸ Likhuva lielie shilili mu mioyo chienyu tawe shichila mwa yambakhana khusuvila mu woyo wa yaruma.³⁹ Musomanga mahandiko shichila mukanakananga lwa mukasomanga munyala khunyola vulamu vwi mihika ni mihika mahandiko matakatifu nako kahananga vushiahidi khwinzi.⁴⁰ Khali ndio, mwa yambakhana khwitsa khwinzi, khu munyole vulamu.⁴¹ Shikali ndi nende lienya lia vandu khunzitsominya tawe.⁴² Navutswa namanya shimwayanza nyasaye mu mioyo chienyu tawe.⁴³ Namala khwitsa khuvirila mu vunyali vwa tata wanje, nikhali mwambakhana khunzinjilitsa. Niva mundu wundi anyala khwitsa khuvirila mu vunyali vwevwe mwene, naye wa munyala khwinjilitsa.⁴⁴ Munyala khuva musuvila munjila shina, niva munyala khwenya vandi vavitsominyi, na muniy shimuhetsanga litsominya khu woyo warula khu nyasaye wonyene tawe.⁴⁵ Muvuli khuva ninganakani ninzi wamuyala khu tata, Musa naye ulitsa khumuyala shichila naye wamwavikhakhu lisuvila lienyu.⁴⁶ Niva mwali mwasuvila Musa mwakhasuvili inzi shichila yahandika makhuva khulondokhana khwinzi.⁴⁷ Niva mwayambakhana khusuvila mukayandika, munyala khusuvila munjila shina makhuva ka mbolanga?

6

¹Matukhu mati nikakhavira yesu yambukha natsia khuluveka lundi lwinyanza ya Galilaya, yalangwa inyanza ya Tiberia.
²shituma shikali shia vandu vamulonda, shichila vali valoli vilolishitsu vievie, kuli yali nahonyinyi vandu valwala.³ yesu yatikulukha khu shikulu niyikhala hasi nende vechi veve.⁴ Litukhu liu mulukha kwa pasaka ya vayahudi liali nilili himbi khutukha.⁵ Lwa Yesu yahenza nalola shituma shia vandu vanyishi nivitsanga havundu ha yali nali yareva Filipu, khunyala khukula hena mikati chia vandu yava vosi vanyala khulia?⁶ khandi yavola likhuva lienelo khuluchelitsa Filipu, shichila mwene yali umanyi shindu shiatsanga khukhola.⁷ Filipu yamuchipa, "tsidinari tsimia tsivili, shitsinyala khukula mikati chia vandu yava vasuchila tawe.⁸ Mulala khu vechi veve walangwangwa Andereya, nali amwavo Simoni Petro yavola⁹ mwana wishiyayi ali hanu ni mikati chiranu chialombwa khu ishahiri nende tsisutsi tsvili, navutswashichinyala khutukha vandu vanyishi tawe.¹⁰ Yesu yavola, voleli vandu vikhale hasi, havundu henaho hali hamela vunyasi vunyishi. vandu vasatsa venavo vikhalaho vosi tsihelefu tsiranu.¹¹ Yesu yavukula mukati, nasanditsa nyasaye khandi nakavila vandu vali nivikhaleho khandi yakhola malala mele khutsisutsi, ma vandu nivakavulilwa mu vunyishi khuli venyanga.
¹² Lwa vali nivakhalia nivakhikura yavolela vechi veve, vunjelitsi matonye ki shiukhulia karikale, khu khuvuli khwononyinyakhu shindu shiosi."¹³ Vavunjelitsa matonye ki mikati chiali nichirikale chialombwa khu ishayiri, nichitsula mihinda likhomi na chivili, vandu nivakhamala khulia.¹⁴ Lwa vandu valola shiloleshitsu shia yesu yali nakholi, vavola, nikilikali, uyu naye muprofeti wenyekhangave niyitsanga mushivala.¹⁵ Lwa yesu yamanya vandu venavo venyanga khwitsa khumuvukula nitsingulu khumwamihitsa yilukha natsia mu shikulu wanyala khuva wonyene.¹⁶ Lwa khulukolovo khwatukha vechi va yesu vakholomokha nivitukha khu inyanza.¹⁷ Vinjila muliaro, nivambukha inyanza khukalukha mulitala lia kaperenamu vutukhu vwutukha, navutswa yesu yali nashili khukalukha khuvo.¹⁸ Matsi karanga khuhilikana lwa imbutsa inditoho yaranga khuhutsa.¹⁹ Lwa vali nivakhakhisundakhu tsikilomita tsiranu khandi ishirini noho salasini, valolaa yesu nachendanga khu matsi, khandi nali himbi khutukha khuliaro vatechela.²⁰ Navutswa yavavolela, ninzi, muvuli khuria.²¹ Khu lienya liavo va mwinjilitsa muliaro navutswa liaro liatukha vwangu khuluchinga havundu havali nivatsitsanga.²² Litukhu lialondakhu, vandu vali nivarikalekhuluveka lundi lwi inyanza vamanya ni liaro lilala lionyene liali nilirikale khandi vamanya yesu shiyali nanini mu liaro halala na vechi veve tawe navutswa vechi veve vali nivaruliyo vonyene.²³ Maro khandi kali nikaruli tiberila kitsa, nikasinjila himbi havundu ha shituma shiali vandu vali nivalilenje mukati ku mwami yesu yali nasanditsi.²⁴ Lwa vandu valola, yesu nende vechi veve vavulaho, vinjila mu maro kenako nivatsia khukhava yesu mu litala lia kaperenamu.²⁵ Lwa vanyola yesu nali khuluveka lwi inyanza, vasureva mwechitsi, isaa shina ya watukha hanu?²⁶ Yesu yavachipa, muvolelanga, mukhavanga inzi navutswa shikanyala khuva shichila mwalola viloleshitsu tawe, navutswa shichila mwalia mikati numwikura.²⁷ Mukhakholi mihinzi khulu khunolashiukhulia shionekhangave tawe, navutswa mukhole mihinzi, khulu khunyola shiukhulia shihananga vulamu vwi mihika ni mihika yishi nashio shiukhulia shiu mwana wu mundu amuha muniy, shichila nyasaye, uli tata wamala khukamilisha.²⁸ Nalwo lwa vandu venavo vareva yesu, shina shia khunyala khukhola, khu khutuililili khukhola mihinzi chia nyasaye.²⁹ Yesu ya vachipa, muhinzi kwa nyasaye yenyanga mukhole, ni khusuvila mu woyo wa yaruma.³⁰ Navo vasureva, nishiloleshitsu shina shiunyala khukhola, khu khushilole khandi khusuvili muyivi ni muhinzi shina kukhola.
³¹ Vakuka veru valia manna mu shiangalangwi, khuli mahandiko matakatifu kavolanga, yavaha mukati kwa valia khurula mwikulu.³² Yesu yavavolela, muvolelanga kilikali shiali musa wamuha mukati khurula mwikulu tawe, navutswa tata wanje naye amuhetsanga mukati kwa toto khurula mwikulu.³³ Mukati kwa nyasaye ni woyo warula mwikulu khandi ahananga vulamu khu vandu mu shivala.³⁴ Navo vasureva, mwami umenye nu kuhetsanga shia khase khosi mukati kwenoko.³⁵ Yesu yavavolela ninzi mukati kuhananga vulamu, mundu witsa khwinzi shianyala khuhulila inzala tawe, khandi mundu wasuvila mwinzi shianyala khuhulila vuluhu tawe.³⁶ Navutswa namuvolela mumali khulola inzi, nikhali shimunyala khusuvila tawe.³⁷ Mundu wosi wa tata wanje yamba alitsa khwitsa khwinzi, khandi mundu ulitsa khwinzi, shinyala khumukhunga tawe.³⁸ Shinarula mwikulu khwitsa mushivala khukhola lienya lianje mwene tawe, navutswa lienya lia woyo wanduma khole.³⁹ Lienya lia nyasaye wanduma lili mbuli khukoritsakhu khali mulala khu yavo vosi vayamba, navutswa visimushitsi vosi khurula mu likhutsa khulitukhu liu khumalilikha.⁴⁰ Lienya lia woyo wanduma, livolanga woyo wosi ulolanga mwana khandi asuvila muye alitsa khunola vulamu vwi mihika lwa nilimwisimushitsa khurula mu likhutsa litukhu liukhumalilikha.⁴¹ Nalwo lwa vayahudi varanga khung'ung'una shichila lwa navoli,"ninzi

mukati kwarula mwikulu." ⁴²"khandi varevana vene, uyu shiali yesu mwana wa Yusufu, mundu wakhwamanya tata wewe nende mama wewe" khuvarevanga munjila shina vitsa khurula mwikulu?"⁴³Yesu yavachipa leshe khung'u ng'una vene. ⁴⁴"mundu avulakhuho unyala khwitsa khwinzi tata wanduma nakhamuleri khwinzi, khandi ninzi ulitsa khumwisimushitsa khurula mulikhutsa litukhu liukhumalilikha. ⁴⁵"kahandikwa mu vaprofeti 'shia mulala alitsa khwechitswa na nyasaye, shia mundu wosi uhulilanga likhuva lia tata, khandi yeka khurula khuye naye witsanga khwinzi. ⁴⁶"munu avulakhuho walola tata, nikhali woyo warula khu nyasaye naye wonyene walola tata. ⁴⁷"muvoelanga mundu usuvilanga naye uli nu vulamu vwi mihika ni mihika. ⁴⁸"Ninzi mukati kuhananga vulamu. ⁴⁹"vakuka venyu valia maana mushiangalangwi khali ndio vakhutsa. ⁵⁰"Navutswa yuku nakwo mukati kwarula mwikulu kwa mundu anyala khulia avuli khukhutsa. ⁵¹"Ninzi mukati kuli mwoyo kwarula mwikulu, niva mundu alitsa khulia mukati yuku, alatsilila khuva mwoyo mihika ni mihika, mukati kwambananga shichila vulamu vwa va ndu mushivala ni mbili kwanje." ⁵²"khulwa yako vayahudi varanga kuhangalitsana vene khu vene nivavola" mundu uyu yakhakhuha munjila shina mbili kwekwe khuli?" ⁵³Yesu yavavolela, muvoelanga kilikali numukhalia mmbili ku mwana wu khandi mung'wi masayi keke, shimuli nu vulamu mu munyi tawe. ⁵⁴"Woyo wosi uliakhu mmbili kwanje khandi ang'wi masayi kanje ali nu vulamu vwi mihika ni mihika, khandi nitsa khumwisimushitsa khurula mulikhutsa khulitukhu liukhumalilikha. ⁵⁵"Mmbili kwanje ni inyama yatoto khandi masayi kanje nikukhung'wa katoto. ⁵⁶"Woyo wosi uliakhu mmbili kwanje khandi ang'wi masayi kanje alatsilila khuva mwinzi ninzi mwene muye. ⁵⁷"Khuli tata ali mwoyo wanduma khandi ndi mwoyo shichila tata khu mundu ulia khu inzi alatsililila khuva mwoyo shichila inzi. ⁵⁸"Yuku nakwo mukati kurula mwikulu, shikuli khuli mukati kwa vakuka venyu valia nivakhutsa tawe, navutswa mundu ulitsa khuliakhu mukati yuku alatsililila khuva mwoyo mihika ni mihika. ⁵⁹Yesu yavola likhuva lienelo niyechitsanga mulisinagogi mu litala lia kaperenamu. ⁶⁰Vanyishi khu vechi va Yesu lwa vahulila navolanga ndio vavola," liechitso yili ni litinyu muno nivina unyala khulihuchilila. ⁶¹"Navutswa Yesu yamanya mu mwoyo kwekwe vechi vilililanga khulondokhana khu likhuva lienelo yavareva, "kamboli kanyala khuva kamunyashitsanga mu mioyo." ⁶²Nikave karina lwa mulola mwana wu mundu nakalukhanga mwikulu mwa yamenyanga? ⁶³"Roho naye uhananga vulamu, tsingulu tsiu mmbili tsivula vukhonyi vwosi. makhuva kamuvolele nako kachilanga numunyola Roho nende vulamu. ⁶⁴"Navutswa vandu valal vali mu munyivakhasuvilanga tawe, Yesu yali wamanya khurula muliranga mundu ulitsa khuvula khusuvila khandi ulitsa khumutsama. ⁶⁵Yesu yatsililila khuvavolela yishi nashio shivune shichila nimuvolela mundu avulakhuho unyala khwitsa khwinzi niyakharumwa na tata. ⁶⁶"kuranjila lwenolo, valala khu vechi va Yesu vakalukha inyuma nivambana khuchenda. ⁶⁷Yesu yareva vechi vene, khali munyi mwenyanga khunzivala. ⁶⁸Ssimon petro yamchiba, mwami nivina wa khutsiakhu? nivi uli na makhuva kahananga vulamu vwi mihika ni mihika. ⁶⁹"Lekha khusuvili khandi khwakhamanya nunundi nivi mutakatifu warula khu nyasaye. ⁷⁰"Nalwo lwa Yesu yavareva, shinamurovola likhomi na vavili. navutswa mulala khu munyi wakwa ibilisi. ⁷¹Yesu yalomoloma makhuva khulondokhana khu Yuda isikarioti mwana wa Simoni. khali niva Yuda yali mulala khu vechi likhomi na vavili, naye wali natsitsanga khutsama Yesu.

7

¹Lwa Yesu yamala khulomaloma khulomaloma makhuva keneyako, yaranga khuchenda mulitaala lia Galilaya, yambakhana khutsia khutsia mulitaala liya Yudea shichila Vayahudi vakhavanga khumwira. ²Matukhu keneyako, shikuku shiavayahudi shiali himbi. ³Vamwavo veve vamuvolela vari," Rula hanu mautsi ivuyahudi, khu veechi vovo valole mihinzi chiukholanga. ⁴Shichila shialikhuho mundu ukholanga vindu mbwivisi, neye yenza khulolekha havulavu, niiva akholanga vindu yivi atushili khwimanyinya mushivala. ⁵"Khali vamwavo veve shivamusuvila tawe. ⁶Yesu yamenya navavolela ari, "isaa yanje ishilikhutukha tawe, nikhali isaa yenyu yayirechekha vuli inyanga. ⁷Shivala shishinyala khuvaambakhana tawe, nikhali shiambakhana inzi shichila mbana vushahiti khulondakhana khumihinzi chivavo mitamanu. ⁸Munyi tsii mushikuku; nikhali inzi nzia tawe shichila isaa yanje ishili khutukha." ⁹Lwa yaali niyakhamala khuvavolela makhuva yaka, yatsilila khwikhala Galilaya. ¹⁰Nikhali lwavamwavo veve vaali nivakhatsia mushikuku, nalwo lwa ye khandi yatsia mushikuku, nikhali shiyatsia munjila ya havulavu tawe, nikhali yatsia mbwivisi ¹¹Vayahudi vamukhava muvandu vaali nivitsi mushikuku nivarevana vari, "ali halishina?"¹²"Khwaali niling'ung'una linyishi khulondakhana khu Yesu. vandu valala vavola vari " Numundu muleyi." vaandi vavola," tawe, akata vaandu." ¹³Nikhali avulakhuho mundu walomaloma havulavu khulondakhana khuye tawe, shichila vaali varili vayaudi. ¹⁴Lwashikuku shiali nishiakhutukha hakari, Yesu yiitsa niyinjila mulitembeli naranga khwechitsa. ¹⁵"Nalwo lwavayahudi vaali nilichenya, nivarevana vari," Mundu uyu yanyoola hena vucheli yuvu? neye shiyasomaklu tawe. ¹⁶Yesu yamenya navachipa navavolela ari," Mechitso kavechitsa yaka shikalikhu kanje mwene tawe, nikhali nika oyo yanduma. ¹⁷Niiva mundu alakhola lienya lielie, alamanya mechitso yaka, niiva karulanga khu Nyasaye, inoho nikanje mwene. ¹⁸"Mundu alomaloma khulondakhana khuye mwene avetsa nakhava vukhumi vwevwe mwene, navutswa oyo akholanga vindu vikhukhuminya oyo wamuruma, mundu khuli mwenoyo nuwakilikali, ni shalikhu muveyi tawe. ¹⁹Koo, Musa shiyavaha malako? nikhali avulakhuho mundu khali mulala khumunyi yakumila malako keneyako tawe. Nikachila shina mikhava khunzira?" ²⁰Shituma shia vaandu vene yavo shiamenya nishimuchipa shiri," Unilitimoni. nivina akhavaanga khwira?"²¹Yesu yavachipa navavolela ari, "Nakhola shikholwa shilala, mamunyi voosi mwavaa nilichenya shichila shikholwa shienesho. ²²Musa shishevo [shikali shishevo shienesho shiarula khu Musa tawe, nikhali shiarula khuvakuka], ma litukhu lia sabato musheva vaandu. ²³Niiva mundu anyala khushevwa khulitukhu lisabato khu malako ka Musa kavuli khumenekwa, kachilashina mundolela vutamanu lwa nombi mundu khuva mulamu khulitukhu lisabato? ²⁴"Khulwa yako,

mwakhakhalachi likhalaka liukhukhola nitsimoni tawe, nikhali mukhalache likhalaka lia toto."²⁵Vandu valala khuvandu vaali Yerusalemi vavola vari," Koo, shiali uyu wavakhavanga vamwire?"²⁶Loli, alomalomelanga vutswa havulavu, nivavolakhu shindu shioshi khuye ta. Kanyala khuva vimilili shivamenyikhu ndi uyu neye Christo tawe, nindio kali toto?"²⁷Nikhali khutsi khwamenya wumunduyu arulanga. Nikhali lwa Christo yiitsa, avulakhuho mundu yiitsa khumenye walirulila ."²⁸Nalwo lwa Yesu yalanjilila mwikulu naali mulitembeli,yavechitsa navoola ari, " munyi voosi mwamenya vuleyi sana nende wandulanga, shitsileri mwene tawe nikhali oyo yanduma nuwakilikali, numwamunyakhu tawe. ²⁹Yinzi namumenya shichila narula khuye khandi neye yanduma."³⁰Vachelitsa khuli vanyala khumukumila, nikhali avulakhuho mundu yamutilakhu tawe, shichila isaa yeye yaali nishili khutukha. ³¹Nikhali vaandu vanyishi vaali mushituma vamusuvila,nivavola vari," Lwa Kristo yiitsa, alakhola vikholwa khuvira viuyu akholi?" ³²Mafarisayo vahulila vaandu nivamonyananga khulondakhana khuYesu, nalwo lwa mwimilili wavasalisi nende mafarisayo varuma varumishi khumukumila.³³Nalwo lwa Yesu yavavolela ari," Shili namunyi kumatukhu mati vutswa mangalushili oyo yanduma.³⁴Mulakhavakhu nikhali munyoola tawe; Niwanzitsa, shumuli nuvunyali vukhwitseyo tawe."³⁵Vayaudi varanga khurevana vari,"Mundu uyu natsi alishina wakhutsi khukhanyala khumunyola? inoho yenza khutsia muvandu vitsimbisa tsindi khuvechitsa?"³⁶Kachila shina avoli ari, " mulakhava nikhali munyola tawe; ni wanzitsanga, shumulikhu nuvunyali vukhwitsayo tawe."³⁷Litukhu liukhumalilikha, liumulukha kushikuku, Yesu yasinjila nalanjilila mwikulu ari, "Mundu wosi ali nuvululu,yiitse khwinzi angw'i. ³⁸Khuli maandiko matakatifu kavolanga, mundu wosi yasuvila mwinzi virula via matsi kilimenya vilarula muye."³⁹Nikhali yavoola likhuva liene yelo khulondakhana khu Roho mutakatifu watsitsa kuhana khuyavo vatsitsa khumusuvila; shichila Yesu yaali nashili khuhelwa luyali. ⁴⁰Vaandu valala vumushituma, lwavahulila makhuva yaka, vavola vari," kakilikali uyu numuprofeti. " ⁴¹Vaandi nivavola vari," Uyu ni Kristo." nikhali vaandi vamenya nivarevana vari," Kristo arula mukalilaya ni? ⁴²Maandiko shikavola kari,"Kristo alarula mulwivulu lwa Daudi nalio nilili litaala lia Betselehemu, lia Daudi yarulamu?"⁴³Khulwa yako, vwaukhani vwrulila hakari havo shichila yee. ⁴⁴Valala khuvo khali vamukumila, nikhali avulakhuho mundu yamutilakhu tawe.⁴⁵Nalwo lwa varumishi va vimilili vakalukha khuvavasalisi nende vafarisayo, vavareva vari, "kachila shina mukhamuleri?" ⁴⁶Varumishi vamenya nivachipa vari," Avulakhuho mundu anyala khulomaloma ari tawe."⁴⁷Nalwo lwamafarisayo wamureva vari, " khali munyi mukatilitswi ni? ⁴⁸Nivina khuvamihi inoho mafarisayo vamusuvilanga? ⁴⁹Nikhali vaandu vakhamenya malako yava, valamwa."⁵⁰Nalwo lwa Nikotemo[mulala khuvafarisayo, yiitsa khu Yesu vutukhu] yavareva ari, ⁵¹"Koo malako keru kakhalachila mundu numushili khuhulila lilomaloma lielie nilikhola lielie?" ⁵²Nalwo lwavamuchipa nivamureva vari, "Khali ive urula kalilaya ni? khava alanyola uri mundu wosi akhuho arulanga mukalilaya tawe."⁵³[Nalwo lwa shiamundu yatsia munzu mwemwe mwene.

8

¹Yesu yatsia khushikulu shia misaituni. ²Lwavwashia nukushili mavwevwe yakalukha mulitembeli, a vandu vosi nivitsa; yikhala hasi naranga khuvechitsa. ³Vaandichi nende navafarisayo valera mukhali yaali nanyoleshe nakhula vuheyi. Nivamuvikha hakari wa vaandu"Vamenya nivamuvolela vari," mwechitsi, mukhali uyu anyolekhan nakhola vuheyi. ⁵Khulondakhana khumalako, Musa yakhuvolela ari mundu khuli mwene uyu aleswi machina; Ive uvolakhu urina khuye?" ⁶Valovola makhuva yaka khumuchelitsa khuvatushi khunyoola shivune shukhumuyaala, nikhali Yesu yinama hasi naranga khwandika hasi nishitere shieshie⁷Lwavatsilila khumureva marevo, yasinjila navavolela ari," Mundu vosi khumunyi ashili khukholakhu vwoni, ave ukhuranga khumulesa machina." ⁸khandi yamenya niyinama hasi, naranga khwandika hasi heneyaho nishitere shieshie.⁹Lwavahulila makhuva keneyako, varula shia mulalamulala, khuranjila khumukali. mulimalila Yesu yarikala wonyene, numukhali yaali narelelwi hakari. ¹⁰Yesu yasinjila namureva ari," Mukhali, vaandu vakhuyaalienjie vahena? Mundu vosi akhukhalachilikhu?" ¹¹yamenya namuchipa ari, avulakhuho mundu vosi tawe, Mwami." Yesu yamenya namuvolela ari, " Khali yinzi shinzitsa khukhalachila tawe. tsia, na wakhatsililakhu khukhola vwoni tawe."¹²Khandi yesu yamenya navaolela ari, "ninzi vulavu vumushivala; mundu wosi anondanga shiatsitsa khuchenda mushisundi tawe, nikhali alava nuvulavu vuvulamu." ¹³Vafarisayo vamuvoleda vari," ive mwene wihanila vushuhuda; vushuhuda vwovwo shuvulikhu vwakilikali tawe."¹⁴Yesu yavachipa navavolela ari," khali niiva nzihanila vushuhuda, vushuhuda vwanje nuvwakilikali. namenya wanarula nende wanzitsanga, nikhali munyi shumumenyikhu wanarula inoho wanzitsa tawe. ¹⁵Munyi mukhalachila mundu khulondakhana khutsinganakani tsiumbili; nikhali inzi khalachilakhu mundu wosi tawe. ¹⁶Khali niiva nakhalachila mundu, likhalaka lianje niliakilikali shichila shindi wonyene tawe, nikhali ndi nende Tata yanduma¹⁷Eeh, khali mumalako kenyu kaandikwa kari, vushuhuda vwa vandu vavili nuvwakilikali. ¹⁸Niinzi nzihetsa vushuhuda mwene khandi Tata yanduma ahana vushuhuda khwiinzi." ¹⁹Vamenya nivamureva vari, Tata wowo a halishi?" Yesu yavachipa navavolela ari, "shumwenya inzi inoho Tata wanje tawe; muva numwamenya inzi, khali mwamenya Tata khandi." ²⁰Yavola makhuva yaka naali mulitembeeli havundu havavikha livishilu, avulakhuho mundu yamukumila shichila isaa yeye yaali nishili khutukha. ²¹Khandi yavavolela ari," ndulanga; mulakhaava ni mulakhutsila muvwoni vwenyu. shumunyala khwitsakhu wanzitsa tawe." ²²Vayahudi varevana vari," aliiri mwene? nako kachila avola ari,' wanzitsa shumunyala khwitsayo tawe?"²³Nalwo lwa Yesu yavavolela ari," munyi muli va hasi; inzi ndi wikulu. muli vishivala; inzi shindikhu wishivala tawe. ²⁴Nako kachila nivavolela ndi mulakhutsila muvwoni vwenyu. numukhasuvili ndi niinzi, mulakhutsila muvwoni vwenyu."²⁵Vamenya nivamureva vari, "ive uli vina?" Yesu yavachipa navavolela ari, kanavavolela khurula muliranga. ²⁶Ndinamakhuva manyishi kukhulomaloma nende kukhuvakhalachila. Nikhali, oyo yanduma nuwakilikali; nivindu vianahulila khuye,

navio vinavolela shivala." ²⁷Shivamenyakhulu ndi yaali nalomalomanga khutata tawe. ²⁸Nalwo lwa Yesu yavavolela ari, lwamutsitsa khuchingula mwana wu mundu, nalwo lwamumenya ndi niinzi, khandi shinzikholelakhu shindu shiosi tawe. Nomanomanga makhuva yaka, khuli lwa Tata yanzechitsa. ²⁹Oyo yanduma a veele niinzi, khandi shiyandekhakhu wonyene tawe, shichila khola vindu viosi vimuyanzitsanga. ³⁰Lwa Yesu yaali nashilomalomanga makhuva yaka, vandu vanyishi vasuvila muye. ³¹Yesu yavolela vayahudi vaali nivasuvili muye ndi, "Niiva mulatsilila khumenya mulikhuva lianje, nalwo lwamutsa khuva veechi vaanje vakilikali; ³²khandi mulamenya vwakilikali, nuvwakilikali wwenyovo vulavalomba khuva valakhuli." ³³Vamenya nivamuchipa vari, "Khutsi khuli lwivulu lwa Abrahamu nishukhwavaakhu varukwa vumundu wosi tawe; kachila shina ukhuvolela uri," mulava vavoholole?" ³⁴Yesu yamenya navachipa ari, "Kakilikali, kakilikali, vavolela ndi, mundu wosi akhola vwoni numurumwa wu vwoni ³⁵Murumwa sharikalakhu munzu khase khosi tawe; mwana neye arikalamu khase khosi. ³⁶Khulwa yako, niiva mwana niiva mwana yakhulomba khuva mulakhuuli, ulava mulakhuuli wakilikali. ³⁷Namenya ndi muli vulwivulu lwa Abrahamu; mukhava khunzira shichila likhuva lianje shililikhu nuvwiyangu mumunyi tawe. ³⁸Inzi Mboola makhuva kanalola khu Tata waanje, numunyi mukhola kamwahulila khurula khutata wenyu ³⁹Vamuchipa nivamuvolela vari, 'Tata weru ni Abrahamu,' Yesu yavachipa ari, "muva numwaali vana va Abrahamu, khali mwakhola mihinzi chia Abrahamu. ⁴⁰Nikhali, lweneyulu mukhava khunzira, yinzi mundu avavolele vwakilikali vwanahulila khurula khunyasaye. Abrahamu yakholakhu ari tawe. ⁴¹Munyi mukhola mihinzi chia Tata wenyu." navo vamenya nivamuchipa vari, "Khutsi shukhwivulwakhiu muvuheyi tawe; khuli na Tata mulala: neye naali Nyasaye. ⁴²Yesu yamenya navavolela ari, "Nyasaye ava naali Tata wenyu, khali mwanyaanza, shichila inzi narula khu Tata ma naitsa hanu; shichila shiniitsa mwene tawe, nikhali neye yanduma. ⁴³Kachila shina muvula khuhulila makhuva kaanje?nikachila shumunyala khumbulila tawe. ⁴⁴Tata wenyu ni Ibilisi, khandi mwikomba khukhola vulalili vwevwe. Yaali mwiri khurula muliranga khandi shiasinjilakhu muvwakilikali tawe, kachila vwakilikali shuvulikhu muye tawe. Alomalomanga vuveyi khase khosi, alomalomanga khulondakhana nilivaa lielie mwene shichila numuveyi khandi ni Tata wuvuveyi. ⁴⁵Nako kachila nivavolela vwakilikali, shumusuvila tawe. ⁴⁶Nivina khumunyi anyala khumanyinya ndi inzi ndi mwoni? Niiva mboola kakilikali, kachila shina muvula khusuvila? ⁴⁷mundu wa Nyasaye wosi aulilanga makhuva kanyasaye; munyi amuvahulili tawe kachila shumulikhu va nyasaye tawe. ⁴⁸Vayahudi vamuchipa nivamureva vari, "Shukhwavoolakhu ndi ive uli musamaria khandi unilitimoni?" ⁴⁹Yesu yavachipa ari, "Ndikhu nilitimoni tawe, nikhali naha Tata wanje luyali, numunyi shumumbetsakhu luyali tawe. ⁵⁰Inzi shinzikhavilakhu luyali mwene tawe; nikhali khunumundu mulala akhava khukhalachila. ⁵¹Kakilikali, kakilikali, vavolela ndi, niiva mundu wosi khumunyi alakumila likhuva lianje, shalilola likhutsa tawe. ⁵²Nalwo lwavayahudi vamuvolela vari, "sasa khwakhamanya khuri unilitimoni. Abrahamu navaprofeti vakhutsa; nikhali ive uvola uri, " Niiva mundu wosi alakumila likhuva lianje,shialitsamakhu likhutsa tawe. ⁵³Ive shulikhu mukali khuvira Tata weru Abrahamu yakhutsa tawe, shikali kario? Khali waprofeti vakhutsa khandi. Ive wilomba khuva vina?" ⁵⁴Yesu yamenya navachipa ari, Niiva niha luyali mwene, luyali lwanje nuluhikhaya; Tata wanje neye ambetsa luyali--wamunyi muvola ndi ninyasaye wenyu. ⁵⁵Munyi shumwamumenyakhulu tawe, nikhali inzi namumenya. Niivanyala khuvoola ndi,shinamumenya tawe, nyala khuva ndimuveyi, khuli munyi. Nikhali inzi namumenya, khandi khandi nakumila likhuva lielie. ⁵⁶Tata wenyu Abrahamu yayanza lwayalola litukhu lianje; yasangaala lwayalilola. ⁵⁷Nalwo lwavayahudi vamuvolela vari, "Niiva ive ushili khutushitsa mihika amusini, uvoola urina ati walola Abrahamu?" ⁵⁸Yesu yavachipa navavolela ari, "Kakilikali, kakilikali, vavolelanga, Naliho Abrahamu nashili khwiitsa." ⁵⁹Nalwo lwavamenya nivavukula machina nivaranga khumulesa, nikhali Yesu yivisa ma narula mulitembeli.

9

¹Lwa Yesu yaali naviranga, yalola mundu muvekhu, neye yivulwa khurula mulwivulu lwelwe. ²Veechi veve vamureva vari, "Mwechitsi, niviva yakhola vwooni, numundu noho nivivuli veve, kamulomba yivulwi naali muvekhu?" ³Yesu yamuchipa namuvolela ari, "shalikhu mundu uyuy inoho vivuli veve vakhola vwoni tawe, nikhali nishichila mihinzi chia Nyasaye chiloleshele mu ye. ⁴Nilazima khukhole mihinzi chiu oyo yanduma nukushili mmbasu kuri. Vutukhu vwiitsanga vwa mundu wosi akhanya khuhinzila tawe. ⁵Inzi nishili mushivala, ndivulavu vushivala shiene yishi. ⁶Lwa Yesu yaali niyakhamala khulomaloma ario, yasutsa mare hasi, nalomba matoyi namare keneyako, manamuvekha matoyi kene yako mutsimoni tsietsie. ⁷yamuvolela ari, "tsia, usaave mushiliva shia Silohemu" [lira silohemu limaniisha liri "rumaa"].Nalwo lwa mundu wenoyo yasimukha manatsia khusava, manakalukha nalolanga. ⁸Nalwo lwa varende nende vaandu vaali vamulolienjie matukhu kavira hanyuma yaho menya mundu musevisevi varevana vari, "Uyu shiali mundu yikhalanga nasevaseva?" ⁹Valala vamenya niviyema vari, "neye." vaandi navo nivakeya vari, "aah,aah, nikhali alolekha manya neye." Nikhali yamenya navavolela ari, "ni inzi. ¹⁰Nalwo lwavamureva vari, "Tsimoni tsiotsio tsikukha tsirina?" ¹¹neye navachipa ari, "Mundu wavalanganga Yesu yalomba matoyi narumishila mare keke, manambekha khutsimoni tsianje nambolela ari, 'Tsia Silaomu ma usaave.' nalwo lwanamenya ninzia manisaaava, nalwo lwanaranga khulola." ¹²Vamenya nivamureva vari, "Mundu mwene oyo alihena?" Yavachipa ari, "Manyi waali tawe," ¹³Vamenya nivahila mundu yaali muvekhu mwene oyo imbeli wamafarisayo. ¹⁴Liali litukhu lisabato lwa Yesu yalomba matoyi niyikula tsimoni tsiu mundu yaali muvekhu uyu. ¹⁵Khandi nalwo lwamafarisayo kamureva khuli anyooli lilola litsimoni tsietsie. nalwo lwayamenya navivaalila ari, "Yambekha matoyi khutsimoni tsianje, maniinzia khusaava, nalwo lwandola khutukha lwene yulu." ¹⁶Vafarisayo valala vamuvolela vari, "Mundu uyu yarula khunyasaye tawe, shichila shialondakhu lilako lisabato tawe." Nivaandi vivarena vaari, "Mundu mwooni yakhakhola arina vilolishitso menya yivi?" Lwa yako manyenya nivava

nende liaukhana. ¹⁷khaandi vamenya nivareva muvekhu mwene oyo ndi, Niive uvoola urina khuye khulondokhana lwa akhwikuuli tsimoni?" Muvekhu mwene oyo yamenya navachipa ari, "Mundu oyo numuprofiti." ¹⁸Khali khutukha haene yaho, vayahudi shivaalikhu nilisuvila muye tawe, eti yaali muvekhu mauranji khulola, khutukha lwavalanga vivuli veve. ¹⁹Vamenya nivareva vivuli veve ndi, "Uyu neye mwikhula weenyu wamuvoola yivulwa naali muvekhu? Neye anyooli arina khulola?" ²⁰Nalwo lwa vivuli veve vamenya nivavachipa vari, "Khutsi khwamenya khuri uyu numwaana weru khandi yivulwa naali muvekhu. ²¹Khuli anyooli khulola, shukhumenyi tawe, khandi shukhumanyikhu mundu yamwikula tsimoni tawe khali shumanyikhu khuli yamwikula tawe. Murevi, ye numdu muhindila. Anyala khulomaloma mweene." ²²Vivuli veve vavoola vario, shichila vaali varili vayahudi. Shichila vayahudi veneyavo vaali vahulishitsane khale ndi niiva mundu wosi khuvo aliyema ni Kristo yamuhonyinya, asiuvwi ilwanyi wilisinagogi. ²³Khulondakhana khumureko kwene yuku, nako kachila vivuli veve nivavalela vari, "Ye numundu muhindila, murevi." ²⁴Lwakhavili, vamenya nivalanga mundu yaali navelenje muvekhu, nivamuvolela vari, "Hana yuyali khuyasaye. khutsi khwamenya khuri mundu nu mwooni." ²⁵Nalwo lwa mudu yaali navelenje muvekhu oyo yavachipa navavolela ari, "Yinzi shimanyikhu niiva numwooni tawe. Shindu shilala shiamanyi nindiiko: naali muvekhu, ma lwene yulu ndolanga." ²⁶Vamanya nivamureva vari, "Akhukholele shina? yakhola arina khu tsimoni tsiotsio tsialola?" ²⁷Neye yamanya navachipa ari, "Muvolele khale, nikhali shumumbulili tawe! kachila shina mwenya khukahulila khandi? munyi mwayambakhana khuva valala khu, veve, shinindio kali?" ²⁸Vamanya nivamukondeshela nivamuvolela vari, "Ive uli mweechi wewe, nikhali khutsi khuli veechi va Musa. ²⁹Khwamanya khuri Nyasaye yalomaloma khu Musa, Nikhali khutsi shuhkumanyikhu wu mundu uyu yarula tawe." ²⁸Vamanya nivamukondeshela nivamuvolela vari, "Ive uli mweechi wewe, nikhali khutsi khuli veechi va Musa. ²⁹Khwamanya khuri Nyasaye yalomaloma khu Musa, Nikhali khutsi shuhkumanyikhu wu mundu uyu yarula tawe." ³⁰Musatsa mwenoyo yamenya nachipa navavolela ari, "Yishi nishindu shiukhuchenyinya, andi. shumumenyikhu wayarula tawe, yaafungula tsimoni tsianje. ³¹Khutsi khwamanya khuri Nyasaye aulishitsakhu vandu vooni tawe, nikhali niiva mundu wosi alasikamila Nyasaye nukhukhola vulili vwevwe, amanya amuulishitsa. ³²Khurula lilova niliranga, khushili khuhulilakhu khuri mundu yivulwa naali muvekhu yikulilwi tsimoni tsietsie tawe. ³³Niiva mundu uyu shiyarula khuyasaye tawe, shiakhakholikhu shindu shiosi tawe." ³⁴Vamuchipa nivamuvolela vari, "Ive wivuulwa muvoni, maukhwechitsanga?" Nalwo lwavamenya nivamusuiva ilwanyi. ³⁵Yesu yamanya nahulila ari, vamusuiva ilwanyi wilisinagoki. Yamunyoola namureva ari, "Wasuvila mumwana wu mundu?" ³⁶Vamenya namuchipa namureva ari, "Mwami mwana wu mundu neye vina, khusuvili muye?" ³⁷Nalwo lwa Yesu yamuchipa namwivaalila ari, "Umuloli khale, neye alomalomanga niive uyu." ³⁸Nalwo lumundu mwene oyo yiyima navoola ari, "Mwami, inzi mali khusuvila." ³⁹Yesu yamanya navoola ari, "Likhalaka nalia liachila ninzitsa mushivala, khu, yavo vavekhula vatushi khulola, ni yavo valolanga vatushi khuvekhula." ⁴⁰Vafarisayo valala va yaali niyiitsi navo vahulila makhuva yaka nivamureva vari, "Khali khutsi khuli vavekhu?" ⁴¹Yesu yavachipa navavolela ari, "muva numwaali vavekhu, khali shumwaalikhu nuvwoni tawe, nikhali lweneyulu muvoola muri, ' khulolanga, nalwo lwa vwooni wwenyu vurikala khuvaho."

10

¹"Kakilikali, kakilikali, vavolelanga, oyo winjilanga mushitioli shiamakondi, vuchila khuvirila mumuliango, mundu mwene oyo nishihuvi khandi numunuuli. ²Nikhali oyo winjila khuvirila mumuliango numwayi wama kondi. ³Mulindi wishilivwa amwikulilanga. ma makondi keneyako kahulila mwoyo kwekwe, ma neye alaanga makondi keke khumira ma akarulitsa ilwanyi. ⁴Lwa akarulitsa ilwanyi, akimililanga, ma nako kamulonda, shichila kamenya mwoyo kwekwe. ⁵Shikanya khulondakhu mundu mucheni tawe nikhali kalamwilukha, shichila kamenyakhu mwoyo kumundu mucheni tawe." ⁶Yesu yavavolela makhuva yaka mutsinganu, nikhali shivamanyakhu shindu shiosi khulondakhana khumakhuva keneyako tawe. ⁷Yesu yamenya navavolela ari, "Kakilikali, kakilikali, vavolelanga, ninzi shiliango shishitioli shiamakondi. ⁸Mundu woosi yiitsa imbeli waanje, nishihuvi khandi numunuuli, nikhali makondi kavaulishitsakhu tawe. ⁹Niinzi shilivwa. niiva mundu woosi aliinjila khuvirila khwiinzi, alahonyinywa; aliinjila nukhurula khandi alanyoola shikhulia. ¹⁰Shihuvi shishitsakhu vutswa tawe, nikhali shiitsa kuhuwa, nukhwira nukhwononyinya. Inzi niitsi khu vaandu vave nuvulamu khandi vave navwo muvunyishi. ¹¹Niinzi mwayi muleyi. Mwayi muleyi akhutsila makondi keke. ¹²Mundu arungwangwa khutsia khwayitsa makondi kakhalikhu keke tawe, lwalola shihulukhu nishitsa yilukha maliviri nukhulekha makondi, ma shihulukhu shimunuula makondi keneyako nukhukasalanyinya. ¹³Yilukha shishila arungwangwa khandi shialikhu nuvulindi vuleyi khumakondi tawe. ¹⁴Niinzi mwayi muleyi. khandi namanya makondi kaanje mwene, khandi makondi kaanje ka manya. ¹⁵Tata yamanya niinzi namumenya, khandi inzi mbaana vulamu vwaanje shichila makondi kaanje. ¹⁶Ndinamakondi kaandi kakhalikhu kishitioli yishi tawe. Kenyekhanga kalere, nako kalahulila mwoyo kwaanje khukhuveho nishiayo shilala khandi mwaayi mulala. ¹⁷Nako kachila Tata waanje yanyaanza: Mbaana vulamu vwaanje, khunilivuvukula khandi. ¹⁸Avulakhuho mundu yiitsa anuule tawe, nikhali niinzi mwene ndulitsanga. Ndinuvunyali vukhuvuvukula khandi. Nanyoola lilako lieneyelo khurula khu Tata waanje." ¹⁹Liukhana liamanya nilinyolekhana muvayahudi khandi shichila makhuva keneyaka. ²⁰Vayahudi valala mbunyishi vamenya nivavoola vari, " mundu anilitimoni khandi numulalu. Kachila shina mumuulishitsanga?" ²¹Nivaandi nivavoola vari, " Makhuva yaka shikalikhu kumundu ali nilitimoni tawe. koo, mundu ali nilitimoni anyala khwikula tsimoni tsiumuvekhu ni?" ²²Khulwa yako, khwaali nishikuku muyerusalemi shiukhusalisa litembeeli, nako kaali matukhu kuvushindu, ²³khandi yesu yaali nachenda mulitembeli lia Solomon. ²⁴Nalwo lwavayahudi viitsa nivamuvikha hakari nivamureva vari, "

Nikachila shina ukhunyashitsanga? niiva niive Kristo, khuvolele havulavu."²⁵Yesu yavachipa navavolela ari," Navavolela, nikhali mwasuvila tawe. Mihinzi chiakholanga mulira lia Tata waanje, nachio chihana vushaidi khwiinzi. ²⁶Nikhali shumunyala khusuvila tawe shichila shumulikhu makondi kaanje tawe.²⁷ Makondi kaanje kahulila mwoyo kwaanje; nakamanya, nako kanondanga. ²⁸Kahetsa vulamu vukhanyala khuvwaho tawe; shikalitsa khukhutsa tawe, khandi avulakhuho mundu alitsa khukarulitsa mumikhono chianje tawe.²⁹ Tata waanje, yaamba makondi keneyaka, numukhongo khuvira vaandi voosi, khandi avulakhuho mundu ali nuvunyali vukhukarulitsa mumikhono chia Tata waanje tawe. ³⁰Inzi na Tata khuli shindu shilala. ³¹Nalwo lwavayahudi vatoola machina nivenya khumulesa nako.³²Yesu yamenya navachipa ari, "Navamanyinyina mihinzi minyishi miyalayi khurula khu Tata, numuhinzi shina khumihinzi chianavamanyinyina yecho, chichilanga numundesa machina?" ³³Vayahudi vamuchupa nivamuvilela vari, "Shukhukhulesa machina mihinzi mileyi chiawakhumenyinyina tawe, nikhali khukhulesa shichila unyeka Nyasaye, ive uli vutswa mwana wumundu nikhali wilomba khuva Nyasaye."³⁴Yesu yavachipa navavolela ari," shikahandikwa muvitabu vienyu vimalako ndi,'mboola ndi," Munyi muli vinyasaye?" ³⁵Niiva yavalanga vinyasaye, yavo vilikhuva lia Nyasaye liitsila [ni maandiko shikanyala khumenekwa tawe], ³⁶Toto munyala khuvolela oyo wa Tata yatakasa namuruma mushivala ndi, "unyeka nanga; eti shichila mbooli ndi, " ndimwana wa Nyasaye?"³⁷Niiva shikholanga mihinzi chia Tata wanje tawe, mwakhasuvili tawe. ³⁸Nikhali, niiva khola mihinzi chiechie, khali numukhasuva tawe, suvili mumihinzi chieneyecho khumutushi khumanya muri Tata aveele mwiinzi, ni inzi ndimuye." ³⁹khandi, vachelitsa khumukumila nikhali yilukha khurula mumikhono chiamo. ⁴⁰Yamenya natsia ihale khandi imbela wa Yordani havundu ha Yohana yavatsilanga vaandu lukhuranga, namenya iweneyo. ⁴¹Vaandu vanyishi wamwitsila neye navavolela ari, " kakilikali, Yohana yakhola vilolishitso tawe, nikhali makhuva koosi ka yohana yalomaloma khulondakhana khumundu uyu, nikakilikali." ⁴²Vaandu vanyishi vamusuvila.

11

¹Khwaali numundu mulwale, khurula mulitaala lia Bethania alangwangwa Lazaro. Bethania weneyo naho wa Meli nende Malita vamenyanga. ²Meli mwenoyo neye yavekha Yesu makure nalila, milika chiechie nichichetulukha khuvilenje via Yesu napangusa niliswi lielie, neye naali mbotso Lazaro.³Vakhana yava vamenya nivarumana, mundu atsi alaanje Yesu, amuvolele ari, "Mwami. lola, muyanzwa wowo numulwale." ⁴Lwa yesu yahulila ario, yavatinylitsa ari, "Vulwale yuvu shuvulikhu vukhwira tawe, nikhali nuvukhuhana luyali khunyasaye khu, mwana wa Nyasaye atushi khunyoola luyali muvwo."⁵Yesu yaali yayaanza mata numukhana wavo nende Lazaro. ⁶Lwa Yesu yahulila ari Lazaro numulwale, yatsilila khwikhala wayaali natsilenje matukhu kaandi kavili. ⁷Lwamatukhu kavili kavua, yavolela veechi veve ndi, " chendi khukalushi ivuyahudi." ⁸Veechi veve vasureva vari, " Mwechitsi, matukhu kavira hanyuma yaho, vayahudi vachelitsa khukhulesa machina, khandi ukalukha iweneyo ni?" ⁹Yesu yavachipa navareva ari, "shukhuli nitsisaa kumi na mbili shia khwitukhu? niiva mundu alachenda mmbasu, shiatsitsa khwisikarila tawe, shichila alarumishila vulavu vushivala yishi khulola. ¹⁰Nikhali mundu mwene oyo alachenda vutukhu, alisikarila shichila vulavu vwene yo shuvulikhu muye tawe," ¹¹Lwayaali niyakhamala khulomaloma makhuva yaka, yamenya navavolela ari, " mulina weru Lazaro amali khukona, nikhali nzitsa khumuvushitsa." ¹²Veechi veve vavuvolela vari," mwami, niiva akoni, alavukha mwene, khandi alavatsa vuleyi." ¹³Yesu yalomalomanga khulondakhana khulikutsa lia Lazaro, nikhali veechi veve vakanakananga vari Yesu yalomalomanga khulondokhana khulikona liukhuhulukha. ¹⁴Nalwo lwa Yesu yamenya navavolela havulavu ndi, "Lazaro akhutsi. ¹⁵Ndinuvuyaanzi; shichila munyi, ndi shimbeleho khumusuvili tawe. Hambu khutsi khumulole." ¹⁶Tomasi, wavalanganga didimasi, yavolela veechi veshie ndi, "Chendi khali khutsi, khutsii khukhutsi halala na Yesu." ¹⁷Lwa Yesu yatukha, yanyoola Lazaro namali matukhu kanne mushilindwa. ¹⁸litaala lia Betsania liali himbi nende yerusalemi, nalwo nululi luchendo lutsikilomita tsivili. ¹⁹Vayahudi vanyishi vaali vitsi khutinyilitsa Malita nende meli khulondakhana khulikutsa liumuyayi wavo. ²⁰Lwa malita yahulila ari Yesu yitsanga, yatsia khumwakaanila, nikhali meli yarikala niyikhaale munzu. ²¹Malita yamenya navolela Yesu ari, "Mwami, uva nuvelenje hanu, muyayi weru khali akhutsi tawe. ²²Khali Iweneyulu, manyi likali ndi, shindu shiosi shutsitsa khure khurula khunyasaye , alakhuha." ²³Yesu yamenya namuchipa ari, " Amwiru wowo alisiimukha." ²⁴Malita yamanya namuvolela ari, " Manyi ndi yiitsa yisimukhi, mulitukhu liukhumalilikha lia vaandu khwisimushitswa." ²⁵Yesu yamuchipa namuvulela ari, Niinzi lisiimukha nende vulamu, mundu woosi asuvilanga mwiinzi, khali niiva atsitsa khukhutsa, alanyoola vumenyo; ²⁶ni mundu wosi ashili mwoyo nasuvili mwiinzi shialikhutsa tawe. Koo unilisuvila mumakhuva kamboola yaka ni?" ²⁷Malita yamenya niyiyama namuvolela ari, " Eeh, Mwami, ndinilisuvila ndi uli Kristo, mwana wa Nyasaye, yiitsanga mushivala." ²⁸Lwayaali niyakhamala khuvoola ario, yarula natsia khulanga mukhana wavo Meli havandu wakhalikhuhuho tawe. yamwnya namuvolela ari, " Mwechitsi yiitsi neye akhulanganga." ²⁹Lwa Meli yahulila ario, yasimukha vwangu natsia wa Yesu yaali naali. ³⁰Yesu yaali nashili khutukha mulitaala tawe, nikhali yaali nashili havundu wa Malita yaali namuleshi. ³¹Khulwa yako, vayahudi vaali neye munzu, nivavatinyishitsa mioyo, valola Meli niyilikhokanga maliviri, vamulonda, nivakanakananga vari atsitsa wavayevele mwana wavo alilileyo. ³²Lwa Meli yatukha havundu wa Yesu yaali naali manamulola, yakwa hasi namuvolela ari, " Mwami, uva nuvelenje hanu, Amwiru waanje yakhakhutsi tawe." ³³Lwa Yesu yamulola halala ne vayahudi vayaali niyitsi navo nivikhulanga, Yahulila khuyia mumwoyo kwekwe, naava nilinyakhana; ³⁴Yamanya navareva ari, " mumuyeveele hena?" nalwo lwavamuchipa vari," Mwami, hamba ulole." ³⁵Yesu yikhuula. ³⁶Vayahudi vemenya nivavorana vari, " Lola khuli yaali niyayanza Lazaro!" ³⁷Nikhali valala khuvo varevana vari, "Shiyaali mundu uyu, yiikula tsimoni tsiumundu yaali muvekhu, kachila shina avuli khwisimushitsa mundu akhutsi

uyu?"³⁸Yesu yatsilila khuyi a mumwoyo kwekwe, natsia khushilindwa. Vwina vwavaali nimurelimu shuvwaali nuvukhunishilwi namalova tawe, nikhali vwaali vukhunishilwi nilichina likali. ³⁹Yasu yavavolela ari, " Rulitsikhu lichina yili." Malita mbotso Lazaro, yaali nakhutsi, yavolela Yesu ari, "Mwami, lweneyulu aranzi khukunda shichila amali mushilindwa matukhu kanne." ⁴⁰Yesu yamureva namuvolela ari, " Shiali yive wambolele nje ndi, nuvele nilisuvila khali uloli vukhumi vwa Nyasaye?"⁴¹Vamenya nivarutsa lichina khuvwina vwene yovo, Yesu yahenza mwikulu navoola ari, " Tata, khusanditsa shichila umbulishitsanga. ⁴²Namenya ndi umbulishitsa khase, nikhali mboola ndio shichila vaandu vaandu niinzi yava, khuvatushi khusuvila ndi nive wanduma,"⁴³Lwa yaali niyakhamala khuvoola ario, yaliila ikulu navoola ari, " Lazaro, hamba ilwany!" ⁴⁴Mukhutsu mwene oyo yamenya niyiitsa ilwany; vilenje vievie nimikhono chiechie viali vivohelwi nitsingulu, khandi mumwoni mwemwe mwaali muvohelwi nitsinguvu. Yesu yamenya navavolela ari, " muvohololi amumulakhuli atsi!"⁴⁵Vayahudi vanyishi vaali nivitsi khuchendelela Meli nivalola ka Yesu yaali nakholi vamenya nivamusuvila. ⁴⁶Nikhali valala khuvo varula nivatsia khumafarisayo nivavavolela vindu via Yesu yaali nakholi. ⁴⁷Nalwo lwa lwavasalisi vakali nende vafarisayo valomba shikhalo nivarevana vari, " Nukhukhole khurina?" mundu atsilila khukhola vilolishitso vinyishi. ⁴⁸Niiva khulamulakha wonyene tsa andi, vandu voosi valatsilila khumusuvila; khandi Varoma valiitsa mavavukuli havundu weru hanu nende shivala shieru shinu." ⁴⁹Mundu mulala khuvo, alangwangwa Kayafa, yaali naali musalisi mukali muhika kwene yoko, yamenya navavolela ari, "Munyi voosi, shikhuho shiamumanyi tawe. ⁵⁰Shumukanakanakhu muri katushili mundu mulala akhutsili vandu, khuvira shivala shiosi khutivitswa." ⁵¹Likhuva liyavoola yelo, liarulakhu khutsinganakani tsietsie mwene tawe. nikhali, lwayaali naali musalisi mukali mwihiika kweneyoko, yahana vuprofeti vukhuvoola ndi, Yesu alakhutsila shivavala; ⁵²Khandi shiatsitsa khukhutsila shivala shionyene tawe, nikhali, khu, vaana va Nyasaye vaali nivasalanyinywa vatushi khuvunjelitswa nukhuvaliomba vave shindu shilala. ⁵³Khurula litukhu lieneyelo khuthia khumbeli, varanga khupanga khuli vanyala khwira Yesu. ⁵⁴Khurula haeneyaho, Yesu yalalkha khuchenda havulavu havayahudi yanyala khumulola, nukhali yarula mushivala shieneyesho natsia mushivala shili himbi nende mushiangalangwi shili mulitaala lia Ifraimu. Yatsilila khuva iweneyo nende veechi veve. ⁵⁵Litukhu li ipasaka yavayahudi liali himbi khutukha, ma vaandu vanyishi varula mumataala kavo khutsia Yerusalemi litukhu liene yelo nilishikhutukha, khuvatushi khwirechekha mumioyo. ⁵⁶Khulwa yako, vamanya nivaranga khukhava Yesu. lwavavula khumunyoola, varanga khureva vari "mukanakana muri? lelo yiitsa mu shikuku tawe ni?" ⁵⁷Vimilili vavasalisi vaali nende vafarisayo vahana lilako ndi, mundu woosi amanyukhu wa Yesu ali, avavolele khutushi khumukumila.

12

¹Nikashili matukhu sita khutukha litukhu li ipasaka, Yesu yiitsa betsani, wayaali niyisimushitsenje Lazaro khurula mulikhutsa. ²Vamenya nivalomba shikhulia shia halukolova, Malita neye yaali mutendi, nikhali Lazaro yaali mulala khuvaandu valiila shikhulia halala na Yesu khumesa. ³Nalwo lwa Mariya yavukula makure kukhwivekha kali nuvukuli vululu, navekha Yesu khuvilenje, manamupangusa niliswi lielie. Inzu yoosi yamenya niyitsula mwayu kwamakure keneyako. ⁴Yuda Isikarioti, mulala khuvechi veve, wakaali nikavoleshe alamutsama, yareva ari, ⁵"Kachila shina makure kukhwivekha yaka kakhakulitswi tsishilinjii tsimia tsivaka, amang'ondo keneyako kahelwi vamanani?" ⁶Shikali yavoola makhuva yaka, shichila yenza khukhonya vatakha tawe, nikhali nishichila yaali shihuvi, Neye yaali nishikapu shitsisendi makhandi yaali nuvunyali vukhuhuva shindu shiosi shialimu. ⁷Yesu yamenya navavolela ari, " Leshi avishi makure makure ka arikaale nako shichila litukhu liukhurelwa khwanje. ⁸Mulatsilila khumenya navamanani. Nikhali shumutsa khuva niinzi khase khosi tawe. ⁹Lwashituma shiavayahudi vamenya wa Yesu yaali, vamenya niviitsaho, navo shivenya Yesu wonyene tawe, nikhali veenya khali Lazaro, wa Yesu yaali niyisishitsenje khurula mulikhutsa. ¹⁰Vasalisi vakali vamenya nivavolelana khuli vanyala khwira Lazaro; ¹¹Shichila neye yalomba vayahudi vanyishi nivarula nivaranga khusuvila Yesu. ¹²Litukhu lialondakhu vandu vanyishi viitsa mupasaka. Lwavahulila vari Yesu yiitsa y mulitaala lia Yerusalemi, ¹³vamenya nivavukula tsisia tsiamashindu nivatsia khumwaakanila nivalanjilila mwikulu vari, "Hosana! Akasitswi oyo yiitsanga mulira liu Mwami, mwami wavaisraeli." ¹⁴Yesu yanyoola mwana wi Ipunda niyikhalakhu, khuli lwahandikwa, ¹⁵wakharia tawe, mukhana musioni; lola, mwami wowo yiitsanga, neye yikhaale khu mwana wi Ipunda. ¹⁶Veechi veve shivamenyakhu muliranga kaali nikakholekhangwa tawe; nikhali lwa Yesu yachingulwa, nalwo lwaviitsushitsa vari makhuva yaka kaali kahandikilwa ye khandi vaali vamukholele khale vindu viene yivi. ¹⁷Shituma shiavandu vene yavo, vahana vuloli vari, vaali neye lwayalanga Lazaro khurula mushilindwa namwisimushitsa khurula mbakhutsu. ¹⁸Shiali shivune shilala shieneyishi, shialomba vaandu vaali nivivunjelitse khutsia khumwakaanila, shichila shikhulwa shiyaali nakholienje. ¹⁹Vafarisayo vavolelana vene khuvane vari, "lola, shivulakhuho shindu shiosi shileyi shiakhunyala khukhola tawe; lola, shivala shiosi shimulondi." ²⁰Khandi khwaliho nende vakiriki vaali nivatsitsa khusaala hamulukha heneyaho. ²¹Vandu veneyavo vamenya nivatsia khu Filipino, yarulanga Betsesaida mulitaala lia Galilaya, nivamuvolela vari, mukhongo, khwenya khulolakhu Yesu." ²²Filipo yatsia navolelakhu Andereya; manivarula voosi vavili khutsia khuvolela Yesu. ²³Yesu yamenya navachipa ari, " Isaa yukhuhana vukhumi khu mwana wumundu imali khutukha. ²⁴Kilikali, kilikali, vavolelanga, khutukha vukutsa vwianganu ukwii hasi mumalova mavukhutsi, vularikalatsa vurio vwenyene; nikhali nuvukhutsi, vwamanga tsimuhu tsinyishi. ²⁵Mundu ya yaanza vulamu vwevwe alitsa khukoritsa; nikhali oyo yakhayanza vulamu vwevwe mushivala munu alitsa khuvuvikha shichila vwaami vwimihika. ²⁶Niiva mundu vosi alenya khundumishila, leshi anonde; ni wanitsa mbe nindi, murumishi wanje yiitsa khuvaho. niiva mundu wosi alitsa khukholela muhinzi, Tata alitsa khumuha luyali. ²⁷lweneyulu mwoyo kwanje kunyakhananga nimbole shina? "Tata,

mbonyinya khurula lweneyulu: Nikhali niitsa shichila isaa iyi. ²⁸Tata, hana lukhumi khulira liolio." Nalwo lwa mwyo kwarula mwikulu nukuvoola kuri,"Mali khulikhuminya khandi nzitsa khulikhuminya khandi." ²⁹Nalwo lwa shituma shiali nishisinjiliho shiahulila nishivola shiri nilikulu lihilikane. vaandi nivavola vari, "Lilaika lilomelome khuye." ³⁰Yesu yavachipa navavolela ari," Mwoyo yuku shukulomelomenje kwiinzi tawe, nikhali kulomelomenje khunyi. ³¹Nunu nukhukhalachilwa khwishivala: nunundi kunu nalwo lumukali wishivala atsa khusuvwa ilwany. ³²Lwanzitsa khuchingulwa mushivala, nalera vaandu vosi khwiinzi." ³³Yavoola ario khumenyinya likhutsa lia alikhutsa. ³⁴Shituma shiavandu shiamenya nishimuchipa shiri,"Khwahulila khurula khumalako ndi Christo alamenyaho muhika chiosi. Nikachila shina uvoola uri, 'Khutukha mwana wumundu achingulwi yikulu'? mwana wumundu neye vina?" ³⁵Yesu yavachipa navola ari," Vulavu vushilekhutsa namunyi hati vutswa. Chendi numushilekhu nuvulavu vweneyuvu, khushisundi shivuli khuvarira tawe. Mundu achendela mushisundi amenyikhu watsitsa tawe. ³⁶Numushili muri nuvulavu, suvili muvwo khumuve vaana vuvulavu." ³⁷Khali niiva Yesu yaali avakholele vilolishitsu vinyishi, shivaalikhu nilisuvila muye tawe ³⁸Yaka koosi kakholekha khu, likhuva liumuprofeti Isaya litushi khurweshitswa, lwayavoola ari,"Mwami asuvili iripoti yeru,khandi neye wumukhona kumwamikuloleshele." ³⁹Khulwa yako, nivanyala khusula tawe, shichila khali Isaya yaali yavoola khale ndi, ⁴⁰Yavavekhulitsa tsimoni tsiavo, yaloomba mioyo chiamo khuva mitinyu, kava nikakhali kario tawe khali vene vilolela nukhumanya nimioyo chiamo vene, mavashendushi, maneye avahonyinyi. ⁴¹Isaya yalomaloma makhuva yaka shichila, yalola vukhumi vwa Yesu manalomaloma khuye. ⁴²Nikhali vanyishi khuvimilili vavo vasuvila muyesu; nikhali shivavola havulavu tawe, shichila varia vari vafarisayo vanyala khuvakhunga khurula mumasinagogi kavo. ⁴³Vayanzilila vukhumi vurula khuvandu khuvira vukhumi vurulanga khu Nyasaye. ⁴⁴Yesu yalila mwikulu navoola ari,' Oyo yasuvila mwiinzi, shiyasuvila mwiinzi wonyene tawe nikhali, khandi yasuvila mu oyo yanduma, ⁴⁵khandi oyo undolanga, alolanga yaanduma. ⁴⁶Niitsi menya vulavu mushivala, khu oyo asuvilanga mwiinzi avuli khurikala mushisundi tawe. ⁴⁷Niiva mundu wosi atsa khuhulila makhuva kanje ma avuli khukasuvila, shinzitsa khumukhalachilakhu tawe; shichila shinayitsa khukhalachila shivala tawe, nikhali niitsa khushihonyinya. ⁴⁸Oyo wanzambakhana makhandi shiavikhanga makhuva kanje tawe, nako kalimukhachila. Likhuva lianomenome yili litsa khumukhalachila litukhu liukhumalilikha. ⁴⁹Shichila shinomanomanga makhuva kanje mwene tawe, nikhali ni Tata yanduma, shicila yamba malako,khulondakhana shianyala khuvoola nukhulomaloma. ⁵⁰Namenya ndi, malako keke nako vulamu vwi mihika nimihika, khandi katata yambolela nako navavolelanga yaka.

13

¹Lwalitukhu lipasaka liali nilishili khutukha, Yesu yamenya ari isaa yeye yaali itushi yukhurula mushivala nukhutsia wa Tata. lwayaali niyakhayaanza vaandu veve vaali mushivala, yavayaanza khutukha mulimalila. ²Lwavaali nivashilitsa shikhulia shia halukolova, shetani yinjila mumwoyo kwa Yuda Iskarioti naali mwana wa Simon, khutsama Yesu. ³Yesu yaali yamenya ari Tata yaali yamuha shia shindu shiosi mumakhpno keke, khandi yarula khunyasaye ma khandi yaali nakalukha khunyasaye-- ⁴Lwayaali niyakhamala khulia shikhulia shialukolova, yasinkila navukula itaulu niyivoha mushisindi mwemwe. ⁵Yamanya natsukha matsi khulukalayi naranga khusavitsa veechi veve vilenje, navapangusa nitaulu ya yaali niyivoyi mushisindi mwemwe. ⁶Ma niyiitsa khu Saimoni Peter, ma peter namureva ari, " Mwami, khali yinzi unyala khusavitsa vilenje vianje ni?" ⁷Yesu yamenya namuchipa ari, "kakholanga shunyala khukamanya nunu tawe, nikhali mwitsa mukamenye khale." ⁸Petro yamuvolela ari, "Ive shunyala khusavitsakhu vilenje vianje tawe." Yesu yamenya namuchipoa ari,"Niiva shinyala khukhusavitsa vilenje tawe,,shuli mulalakhwinzi tawe." ⁹Simon Petro yamuvolela ari," Mwami, wakhasavitsa vilenje vionyene tawe, nikhali ulasavitsa khali mikhono numurwi." ¹⁰Yesu yamuvolela ari,"Oyo wasavitsi shiinyekha khusava khandi tawe, nikhali numunihi havundu hosi; khandi numunihi, nikhali shivali voosi vaali vanihu tawe." ¹¹(shichila Yesu yaali amenyi mundu yaali niyenya khumutsama; nalwo lwayavoola ari, " shumuli voosi vanihu tawe." ¹²Lwayaali niyakhamala khuvasavitsa vilenje viavo, yavukula inguvu yeye maniyikhala hasi khandi, navareva ari," Mumenyi shikhulwa shiavakholele nyishi ni? ¹³Munanga mwechitsi khandi Mwamihi, muvoola vuleyi, shichila nindio inzi ndi. ¹⁴Niiva inzi Mwami khandi mechitsi wenyu, vasavitse vilenje vienyu, khali munyi musavitsane vene khuvene. ¹⁵Shichila vakholele shimanyilu, khumutushi khukhola menya lwa yinzi vakholele. ¹⁶Kakilikali, kakilikali, vavolelanga ndi,murumishi shialikhu mukhongo khuivira Mwami wewe tawe; inoho murumwa shialikhu mukhongo khuvira oyo wamuruma tawe. ¹⁷Niiva mulamany makhuva yaka,mulala nuvukaasu niiva mulakakhola. ¹⁸Shinomanomanga khumunyi voosi tawe; Namenya vaandu vanachakula--- nikhali khumaandiko katushi khurweshitswa: 'Oyo wakhiulitsa neye mukati kwaanje yasinjila khwiinzi vutinyu muno.' ¹⁹Vavolela makhuva yaka nikashili khukholekha khulwakava nikholenga, mutushi khusuvila ndi ninzi yee. ²⁰Kakilikali, kakilikali, vavolela ndi, mundu ahuchililanga oyo wanaruma ambuchililanga. nu mundu ambuchililanga ahuchilila oyo yanduma." ²¹Lwa Yesu yaali niyakhalomaloma makhuva yaka, yanyakhana mumwoyo kwekwe. Yahaana vushuhuda navoola ari," kakilikali, kakilikali, vavolela ndi, mulala khumunyi atsa khunzaama. ²²Veechi vahenzana, mulala khuhundi,nivachenya vari niviina wavalomalomakhu uyu! ²³Mulala khuveechi veve, wa Yesu yaali niyayaanza, yaali nakoni hasi wi imeeza haluveka wa Yesu yaali; naali. ²⁴Simoni Petro yalanga veechi va yesu navavolela ari, " murevi ndi nivina walomalomakhu ooyo." ²⁵Yamenya nahekha luveeka lulala lwa Yesu namureva ari, " Mwami, nivina wenoyo?" ²⁶Yesu yamenya namuchipa ari,"nu oyo wanza khuvukula shipande shiumukati kwa nzini musupu nukhumuha." Lwayaali niyakihiina mukati musupu, yamenya nahaa Yuda mwana wa Simon Iscariot. ²⁷Lwayaali niyakhamuha mukati kwene yoko, Shetani yamenya niyinjila muye, Nalwo lwa Yesu yamenya namuvolela ari, "Khola vwangu shindu shukhola yesho." ²⁸Avulakhuho

mundu woosi yaali nakoni hasi himesa yamenya shivune shiachila namuvolela ario tawe. ²⁹Valala vakanakana vari, kachila Yuda neye yaali muvishi vitsisendi, Yesu amuvolela, " akuli shia yeena akuli vitsa khurumikha khulitukhu liumulukha," inoho yeena ahanekhu shindu khuvamanani. ³⁰Lwa Yuda yaali niyakhahelwa mukati, yamenya natsia khulwonyi isaa yeneyo. mavutukhu nuvutukha. ³¹Lwa Yuda yaali niyakhatsia, Yesu yamenya navavolela ari, " Mwana wumundu yeena khuhelwa lukhumu lweneyulu, khandi Nyasaye ahelwa lukhumu muye. ³²Niiva Nyasaye ahelwa lukhumu khuvirila muye, Khandi Nyasaye mulala mwenoyo, alaha mmwana wewe vukhumi muye mwene, ni alamuha lukhumi makhavi lulala. ³³Vana vatiti munyi, nditsa namunyi masaa mati vutswa. mulakha, menya lwanavolela vayahudi, ndina, ' shumunyala khwitsa wanzitsa tawe.; khandi mbolela munyi ndio. ³⁴Vahetsa lilako liyia, likhuvoola ndi muyanzane veene khuveene, khuli lwayiinzi mwene vayaanzi, nindio vutswa khandi kenyekeha muyaanzane. ³⁵Numukhola murio, shia mundu woosi alamenya muli veechi vaanje, niiva mulayanzana veene khuveene. ³⁶Simoni alangwangwa petero yamenya namureva ari, "Mwami, utsitsa hena?" Yesu amuchipa ari, " wa yinzitsanga shumunyala khunoonda lweneyulu tawe, nikhali mulanoonda khale." ³⁷Peter yatsilila khumureva ari, " Mwami, kachila shina mbuli khuloonda lweneyulu? " Inzi nakhukhutsila." ³⁸Yesu yamenya namuchipa ari, " Mayiive ukhutsili toto ni? Kakilikali, Kakilikali, khuvolelanga, Itaywa shitsitsa khulakulakhu nushili khunyambakhana makhavi kavaka tawe."

14

¹"Mwakhavikhu nilihenda mwoyo tawe. Suvili mu Nyasaye: khandi musuvili mwiinzi. ²Munzu mwa tata wanje khulimu nuvwiyaangu vunyishi. ³kakhava nikakhaali kario tawe, khali vavolele, shichila nzitsa khuvalombela vwiyaangu, nakalukha khuvavukula muve niinzi, khumuvee wa inzi mba; niindi. ⁴Munyi mwamenya injila yanondelamu ninzia." ⁵Tomasi yavoleloa Yesu ari, " Mwami, khumenyikhu hutsitsa tawe; khunukhumenye khurina injila?" ⁶Yesu yamenya namuchipa ari, " Niinzi injila, nuvwakilikali, nuvulam: mundu woosi shianyala khwitsakhu khu tata nakhavirili khwiinzi tawe. ⁷Muvaa numwamenya, khali mwemenya tata wanje. khurula lweneyulu khutsia khumbeli mumumenyi makhandi mumuloli," ⁸Filipo yamenya navolela Yesu ari, " Mwami, khumenyinyi wa Tata ali, makhuvee khunyalishi." ⁹Yesu yamenya namureva ari, "Filipo, Ushili khumanya khuvwiyaangu vwa mbeele namunyi yuvu vwosi ni? Mundu vosi andolikhu, aloli Tata. unyala khumbolela urina, khumenyinyi wa Tata ali?" ¹⁰Shumulikhu nilisuvila ndi inzi ndimu Tata ni Tata aveele mwiinzi ni? Makhuva kavavolela yaka, shinomanomanga khuvunyali vwaanje mwene tawe, nikhali Tata amenyanga mwiinzi akholanga muhinzi kwekwe. ¹¹Suvili muri ndimu Tata ni Tata amwiinzi, inoho musuvili shichila vikhole vianakhola. ¹²Kakilikali, kakilikali, vavolelanga, oyo wasuvila mwiinzi alakhola mihinzi chiakhola, khandi alakhola mikali muno khuvira yichi, shichila nzitsa wa Tata. ¹³Shindu shiosi shimutsa khureva mulira lianje, navakholela khu Tata anyoole vukhumi khuvirila khu mwana wewe. ¹⁴Niiva mulareva shindu shiosi mulira lianje, navakholela. ¹⁵Niiva mwanyanza, mulavikha malako kaanje, ¹⁶Ni nasaala khu Tata, neye alavaha mukhonyeni wundi khu atushi khuva namunyi tsinyanga tsiosi-- ¹⁷Mwoyo kuvwakilikali, shivala mashimwiyeme tawe shichila shimulola tawe khandi shiamumenya tawe. Nikhali munyi mwamumenya, shichila amena mumunyi khandi alava namunyi. ¹⁸Shinzitsa khuvulakhakhu menya vaana vanamulekhwa tawe; Nakalukha khuvavukula. ¹⁹Harikaale hati vutswa shivala nishivula khundolakhu khandi tawe, nikhali munyi mulandola. Shichila menyanga, khali munyi mulamenya. ²⁰Litukhu lieneyelo nalwo lwamumenya muri inzi namenya mu Tata, ni Tata neye yamenya mwiinzi, na khandi inzi namenya mumunyi. ²¹Mundu wosi ali namalako kaanje ma akalondanga neye yanyanza ni oyo wosi yanyanza alayaanzwa na Tata, niinzi namuyanza nukhwikhunula khuye." ²²Yuda (shaali Iscariot tawe) yareva Yesu ari, Mwami, kachila shina wimanyinyi khukhutsi vonyene muvuli khwimanyinyi khushivala?" ²³Yesu yamenya namuchipa ari, "Mundu wosi yanyanza, alonda makhuva kaanje. Tata wanje alamuyaanza, khuliitsa muye makhulombe vumenyo vweru neye. ²⁴Mundu wosi yakhanyaanza shialondakhu makhuva kaanje tawe. Likhuva liamuhulila yili shililikhu lianje mwene tawe nikhali lirula khu Tata yanduma khumunyi. ²⁵Navavolela makhuva yaka lwa naali nishimenyi namunyi. ²⁶Khulwa yako. Mukhonyeni-- naali Roho mutakatifu wa Tata yitsa arumi mulira lianje-- alavechitsa shia shindu shiosi nukhuvitsushitsa vindu viosi vianavavolela. ²⁷Valeshela milembe; vahetsa milembe chianje. shivahetsa menya lwashivala shihana tawe. mwakhavikhu nilihenda mwoyo tawe, khandi mwakhavikhu nuvurii tawe. ²⁸Mwahulila nivavolenga ndi, ' ndulanga, khandi nakalukha khuvavukula, ' Niiva mwaali mwanyanza, mwakhavele nuvuyaanzi shichila nzitsa wa Tata, shichila yee numukali khuvira yinzi. ²⁹Vavolele lweneyulu nikashili khwikholekha, khulwakava nikikholekha, mutushikhuva nilisuvila. ³⁰Shinzitsa khulomalomakhu manyishi namunyi tawe, shichila mukali wishivla yishi yiitsanga. Shialik u nitsingulu tsiosi khwiinzi tawe, ³¹nikhalikhushivala shimenye shiri nayaanza Tata, khola khu Tata yambolela khole. Leshi khuruli hanu khwisundi huvunduwundi." ³²Shinzitsa khulomalomakhu manyishi namunyi tawe, shichila mukali wishivla yishi yiitsanga. Shialik u nitsingulu tsiosi khwiinzi tawe, ³³nikhalikhushivala shimenye shiri nayaanza Tata, khola khu Tata yambolela khole. Leshi khuruli hanu khwisundi huvunduwundi."

15

¹Ninzi musaala kwa kilikali, ni Tata waanje neye mulimi. ²Aremanga tsisia tsiosi tsikhaananga matunda mwiinzi, ma atsoola shia lusia lwamaanga matunda khulutsilili khwaama matunda manyishi. ³Munyi mwalombo khale khuva vanihu shichila likhuuva lianavilwatsila. ⁴Rikali mwiinzi, ma inzi khandi ndikale mumunyi. Khuli ma lusia lunyalakhuvula khwihamila matunda vuchila khurikala khumusaala lwakwo, Khali munyi shumunyala khwimenyela veene vuchilakhuvaa mwiinzi tawe. ⁵Niinzi musaala kwamatunda, munyi muli tsisia tsiakwo. Oyo arikala mwiinzi niinzi

ndikala muye, yaama matunda manyishi, shichila vuchila yinzi, shivulakhuho shiamunyala khukhola tawe. ⁶Niiva mundu woosi alavula khurikala mwiinzi, alasiuvwa ilwaanyi menya tsisia nukhuhuma, tsisia tsieneyetso tsivunjelitswangwa nukhusambwa mumulilu, matsiyia. ⁷Niiva mularikala mwiinzi, khaandi niiva makhuva kaanje kalarikala mumunyi, revi shindu shiosi shiamwenyanga, na mulakholelwa. ⁸Tata waanje ahelwa lukhumu muvindu menya yivi, mutushi khwaana matunda manyishi khumutushi khumenyinya ndi muli veechi vaanje. ⁹Khuli lwa Tata yanyaanza, nindio khali yiinzi navayaanza. Rikali muvuyaanzi vwanje. ¹⁰Niiva mulalonda malako kaanje, mularikala muvuyaanzi vwaanje, khuli yiinzi nalonda malako ka Tata waanje, nukhurikala muvuyaanzi vwevwe. ¹¹Vavolele makhuva yaka khu vuyaanzi vwaanje vuve mumunyi khandi khuvuyaanzi vwenyu vutushi khwitsulana. ¹²Yili natio lilako lianje, ndi muyanzane khuli yiinzi navayanza. ¹³Avulakhuho mundu ali nuvuyaanzi vukali khuvira yuvu tawe--ndi mundu mulala akhutsili valina veve. ¹⁴Muli valina vaanje numukholi kavavolelanga. ¹⁵Shinzilila khuvalanga ndi, varumishi tawe, shichila murumishi shiamenyikhu shiumukhongo wewe akhola tawe. Inzi valanji ndi valina, shichila navavolela shindu shiosi shianahulila khurula khutata waanje. ¹⁶Shivali munyi mwanjakula tawe, nikhali niinzi navachakula, nivachinguula khumutushi khuha matunda manyishi, nikhandi matunda kenyu karikale khuvaho. khu shia shindu shiosi shiamureeva Tata mulira lianje, atushi khuvaha. ¹⁷Vivaalila makhuva yaka, khumutushi khuyanzana. ¹⁸Niiva shivala shivaambakhanga, mumenye muri shiaranga khunyambakhana muliranga khushialonditsakhu munyi. ¹⁹Muva numwaali vishivala, khali shiavayaanza menya vandu vashio. Nikhali shumulikhu vandu vishivala tawe khandi shichila navachakula khurula mushivala, nako kachila nishivambakha. ²⁰Itsushitsi likhuva lianavavolela ndi ' murumishi shialikhu mukali khuvira mukhongo wewe tawe.' Niiva vanzaama, khali mulatsamwa; niiva valoonda likhuva lianje, valalonda likhuva lienyu khandi. ²¹Valavakholela vintu yivi viosi shichila lira lianje, khandi shichila vamenyakhu mundu yandula tawe. ²²Vava nivakhilwatsilakhu tawe, khali shivamenyakhu vwooni tawe, nikhali vavulakhu shivune shiosi khuvwooni vwavo vwavakhola tawe. ²³Oyo voosi yanyambakhana yaambakhana khali Tata waanje. ²⁴Mba nakhavakholela mihinzi chiumundu wundi wosi yakhavakholelakhu, Khali shivalikhu nu vwoni vosi tawe, nikhali vamali khale khundola Mavambakhane yiinzi na Tata waanje. ²⁵Nikhali yaka koosi nikholekhanga khurweshitsa makhuva kaandikwa mumalako ndi, ' Vanyambakhana vuchila shivune, ²⁶Lwa mukhonyeni yiitsa-- Wanzitsa khuvarumila khurula khu Tata, Neye naali Roho wu vwakilikali, arulanga khu Tata-- alavaha vushuhuda vwaanje. ²⁷Khali munyi khutukha muhaane vushuhuda, shichila mwaali niinzi khurula muliranga.

16 ¹₂₃₄₅₆₇₈₉ khandi khulondakhana khuvutakatifu, khandi khulondakhana khulikhalachila; ¹⁰¹¹¹²¹³¹⁴¹⁵¹⁶¹⁷¹⁸¹⁹²⁰²¹²²²³²⁴²⁵²⁶²⁷²⁸ V28
Narula khu Tata, maninzitsa mushivala. khandi, ndula mushivala munu nzitsa wa Tata. ²⁹³⁰³¹³² Loli, isaa itukhanga, ee, khandi kakilikali imali khutukha, lwamuva numusalanyinywi, shia mulala natsia ingo wewe, mamundeshe wonyene. shimba wonyene tawe, shichila ndina Tata. ³³

17

¹Lwa yesu yamala khulomaloma makhuva yaka, yahenza mwikulu,navoola ari, Tata, isaa itushi, khuminya mwana wowo, khu mwana wowo neye atushi khukhuminya-- ²Khuli wamuha tsingulu khuvira vindu viosi, khu utushi kuhana vulamu wvimihika chiosi khushiamundu wosi wawamuha. ³Yako nuvulamu vulivamwoyo,vatushi khumanya niive nyasaye wonyene wakilikali, nende Yesu Kristo wayive waruma. ⁴Nakhukhuminya lwanaali nindi mulilova. mali muhinzi kwa wamba khole. ⁵Khulwa yako, Tata, mbe vukhumi vwakhwaali nukhwasanga niive shivala nishishili khulwombwa. ⁶Khunulili vaandu vawaamba khurula mulilova likhuva liolio. vaali vovo, maniive numba, manavo wakumili likhuva liolio. ⁷Nasasa vamanya vari vindu shiosi viawamba viarula khuive, ⁸Shichila vavolele makhuva koosi kawamba. vakavavukula makakilikali vamanya vari narula khwiive, makhandi vasuvila vari niive wanduma. ⁹Vasalilanga.shisalila shivala tawe, nikhali salila yavo va ive wamba, shichila nivovo. ¹⁰Shindu shiosi shili shianje nishiosho, nishindu shiosi shiauli nashio nishianje, khandu khuminywangwa muvio. ¹¹Inzi shishilekhu mulilova tawe, nikavutswa vandu yava vamulilova, khandi nziitsanga wa uli eyo. Tata mutakatifu, viikha yavo,vawamba mulikhuva liolio khuvatushi khuva shindu shilala, khuli ma khutsi khuli shindu shilala. ¹²Lwanaale navo, navavikha vuleyi mulira liolio, liawamba. navaliinda, ni shialikhuho mundu wosi khali mulala mwene yononywakhu tawe, nakhalikhu mwana wuliononywa, khu maandiko katushi khurweshitswa. ¹³Khulwa yako, nzitsa khumunyi, nikhali mboolela makhuva yaka mulilova khu vuyaanzi vwaanje vutushi khurweshitswa muvo veene. ¹⁴Vahele likhuva liolio, ma shivala shivahimi shichila shivalikhu vishivala tawe, khuli lwa inzi khalikhu wushivala shiene yesho tawe. ¹⁵Shikhusayanga uvarutse mushivala tawe, nikhali uvalindi khurula khumutsiku. ¹⁶Shivalikhu vishivala tawe, menya lwa inzi khalikhu wushivala tawe. ¹⁷Vatakase nuvwakilikali, likhuva liolio niliakilikali. ¹⁸Khuli ive wanduma mushivala, nindio khandi inzi varumi mushivala. ¹⁹Shichila liva liavo, inzi nzitakasi, khu khali vo vatushi khwitakasa muvwakilikali. ²⁰Shisalilanga yava vonyene tawe, nikhali salilanga khali yavo vatsitsa khusuvila mwiinzi khuvirila mulikhuva liavo ²¹Khuvatushi khuva shindu shilala, khuli ive Tata, uli mwiinzi, niinzi ndi mu ive. khu khali vo vatushi khuva shindu shilala mukhutsi, khu shivala shitushi khuva nilisuvila ndi niive vanduma. ²²Vukhumi vwawamba, vahele,khuvatushi khuva shindu shilala, menya lwakhutsi khuli: ²³Inzi mbe muvo, niive uve mwiinzi-- vave nuvalula vwitsingulu, khushivala shitushi khumanya ndi niive wanduma, khandi wavayaanza menya khuli wanyaanza. ²⁴Tata, nanya vandu vawamba vave halala niinzi wamba niindi, khandi nanya valole vukhumi vwaanje vwawamba, shichila wanyaanza shivala nishishili khulombwa ²⁵Tata mutakatifu, shivala

shishiakhumanyakhu tawe, nikhali izi nakhumanya; nikhandi vandu yava vamanya vari niive wanduma. ²⁶Navilwatsila likhuva liolio, makhandi nalilomba lihulikane khu, vuyaanzi vwawanyanza navwo vuve muvo, niinzi nava muvo."

18

¹Lwa Yesu yaali niyakhama khuvoola makhuva keneyako, yarula nende veechi veve, nivambukha muchela kulangwangwa Kedroni, nivinjala mumulimi kumisaiduni. ²Khandi Yuda yaali niyirecheshe khutsama Yesu, yaali yamanya havundu hene yaho; shichila Yesu yaali yamenya niyatsia havundu heneyaho nende veechi veve. ³Nalwo lwa Yuda yamanya navukula mukandqa kwavasikali nende varumishi vavasalisi vakali nende mafarisayo, viitsa nitsita, tsitochi nende viuchi. ⁴Khulwa yako, Yesu yaali namanyi kaali katsitsa khwumwiitsila, yamanya narula natsia havukona navo, manavareva ari, "Mukhava vina?" ⁵Vamanya nivamuchipa vari, "khukhava Yesu wanazareti". Yesu yavachipa navavolela ari, "neye inzi" Khandi Yuda yamutsama, yaali halala navandu veneyavo. ⁶Lwa Yesu yavavolela ari, "neye inzi". varanga khukalukha inyuma nivakwa hasi. ⁷khandi Nalwo lwayavareva lwakhavili ari, "Nivina wamukhavanga?" Nalwo lwavamuchipa vari " khukhjavanga Yesu wanazareti". ⁸Nalwo lwa Yesu yavachipa ari, " Shimbele nivavolele khale ndi, neye inzi ni, niiva mukhava inzi, leshi yava vatsii." ⁹Yavoola makhuva keneyako, khulondakhana khuli yaali nasaalienje ari, " Yavo vawaamba shinakoritsakhu khali mulala tawe." ¹⁰Nalwo lwa Simoni Peter yarulitsa shivavi shiyaali nashio narotsela murumishi wumusalisi mukali, manamutema shiroyi shumukhono mulunji. liira liumumumishi mwene oyo lialangwangwa Malchu. ¹¹Nalwo lwa Yesu yavolela Petro ari, "Vikha shivavi shioshio wurulitse. Wenya mbuli khungw'elega mushikombe shia Tata waanje yamba ni?" ¹²Khulwa yako, mukanda kwavasikali nende mwimilili wamafarisayo vakumila Yesu nivamuvoha. ¹³Varula na Yesu nivaranjila khutsia wa Anasi, shichila Anasi mwene oyo yaali mukuuka wa Kayafa, yaali naali mwimilili wavasalisi khumuhika kwene yoko. ¹⁴Kayafa mwene oyo neye yaali niyavolela vavaudi ndi, " Kenyekha mundu mulala akhutsili vaandi". ¹⁵Khandi Simoni Peter yalonda Yesu, halala nende mwechi wundi; yaali niyamanyikhana khumusalisi mukali. Yinjala na Yesu havundu humusalisi mukali yaali niyamenya. ¹⁶Nikhali Petro yarikala ilwany nasinjili hashilivwa. Nalwo lwa mwechi yaali niyamanyikhana numukali wavasalisi, yakalukha ilwany, nalomaloma numukhana yaali nalindi hashilivwa, niyinjilitsa Petro. ¹⁷Nalwo lwa mwana mukhana akhola ikasi yukhulinda shilivwa yareva Petro ari, " Shiali ive mulala khuveechi vu mundu uyu?" Petro yamanya nakeya ari, " niinzi tawe". ¹⁸Varumishi nende valindi, vavwana mulilu; shichila vushindu vwaali vululu; vamanya nivaranga khwora; khali Petro yaaliho niyoora navo. ¹⁹Musalisi mukali yareva Yesu khulondakhana khuveechi veve, nende mechitso keke. ²⁰Yesu yamuchipa ari, " nalomaloma navaandu havulavu mushivala. vuli inyanga nechitsanga mumasinagoki nende mumatembeeli havundu hamafarisayo vaali nivaakanili; khandi shivulakhuho shindu shiosi shianakholakhu muvwivisi tawe. ²¹Kachila shina undeva urio? reva vandu vahulila khurula khwiinzi, nimakhuva shina kanavavolela? lola! vamanya koosi kanavoola." ²²Lwa Yesu yaali niyakhama khuvavolela makhuva keneyako, mulala khuvavumishi yaali nasinjili himbi neye, yamusamula lukhovi namureva ari, " Kachila shina uchipa urio musalisi mukali?" ²³Yesu yamuchipa namureva ari, " niiva mbooli makhuva matamanu, yivalilakhu vandu makosa kaanje, nikhali niiva mbooli makhuva maleyi, kachila shina umasa lukhovi?" ²⁴Nalwo lwa Anasi yavukula Yesu navohelwi, namuhila khu Kayafa mwimilili wavasalisi. ²⁵Khandi Simoni Petro yaali nashili havundu heneyaho niyara mulilu. vandu valiho namureva vari, " niive mulala khuveechi va Yesu?" neye yamanya niyambakhana nakeya ari, " shiali yinzi tawe". ²⁶Mulala khu varumwa vu mwimilili wavasalisi, murumwa mwene oyo yaali mwikho wu mundu wa Petro yarema liroyi, yareva Petro ari, " shali ive wanalola mumulimi kumisaituni numuli na Yesu ni?" ²⁷Petro yamanya niyambakhana, khandi nakaya ari "Niinzi tawe". naho naho itaywa yamanya nilakula. ²⁸Vamanya vavukula Yesu nukushili mavwevwe, khurula wa Kayafa nivamuila muinzu ya vami vakholelamu makhuva kavandu' vimilili wamafarisayo nende musalisi mukali. shivinjala munzu yilikhalaka tawe, shichila shivenya khwinjala mu ibasaka nivali vachafu tawe. ²⁹Nalwa lwa Pilato yarula niyiitsa khuvalola, narevana ari, " Nimakoso shina kumundu uyu akholi kamulombi mumulere hanu?" ³⁰Vamuchipa nivamuvolela vari, " Mundu uyu ava niyakhakhola vwooni, khali shukhamuleri khu ive tawe." ³¹Nalwo lwa Pilato yavavolela ari, " Muvukuli munyi vene, mamumukhalachili khulondakhana khu li malako kennyu kavolanga." Nalwo lwavavaudi vavuvolela vari, " Khutsi khulikhu nuvunyali vukhwiira tawe." ³²Kenyekha makhuva ka Yesu yaali navolienje katushi khurweshitswa, khulondakhana khuli likhutsa lia atsitsa khukhutsa. ³³Nalwo lwa Pilato yakalukha muinzu yilikhalaka, khandi nalanga Yesu, manamureva ari, " Niive mwami wavavaudi?" ³⁴Yesu yamuchipa namureva ari, Niive mwene uvoola makhuva yaka, inooho vaandu navo vakhuvolele khulondakhana khuinzi?" ³⁵Pilato yamuchipa namureva ari, "Koo! inzi ndimuyaudi ni?Vaandu vuluyia lwolwo nende vimilili vavasalisi navo vakhuleri khwiinzi. Ukholi shina?" ³⁶Yesu yamuchipa namuvolela ari, " Mwami vwaanje shuvulikhuvumushivala tawe. Vwaami vwaanje vuva vumushivala, varumishi vanje vakhanwanili, shinakhakumilwi navavaudi tawe. khulwa yako vwami vwaanje shuvulikhuvumushivala tawe. ³⁷Pilato yamanya namureva ari, " Khulwa yako niive mwami ni?" Yesu yamuchipa namuvolela ari " yive niive uvoola uri inzi ndimwami. shivune shiachila ninzivulwa shiali makhuiwa yaka, khandi makhuiwa yako nako kachila ninzitsa mushivala,, khu ndushi khushuhutia vwakilikali. khandi oyo ali nende vwakilikali ahulila makhuva kaanje." ³⁸Pilato yamuchipa namureva ari, " Vwakilikali nashio shina?" Lwayaali niyakhavoola likhuva liene yelo, yarula natsia ilwany navolela Vayaudi ndi, " Ndolikhu makoso kosi kamundu akholi tawe. ³⁹Nilhali, khuli numwima kwavavaudi ndi, kenyekha mboholole mundu mulala, litukhu liabasaka khulwa yako, mwenya mboholole Mwami wavavaudi ni?" ⁴⁰Nalwo lwavakhuva liyoko, nivalanjilila ni ivavola vari, " khuvoholola mundu uyu tawe, voholola Barnaba." Barnaba mwenoyo yaali shihuvi shukhunuula vandu vindu viavo.

¹Nalwo lwa Pilato yavukula Yesu naranga khumukhupa. ²Vasikali vaneka mavua nivara khumurwi kwa Yesu manivamufuala ikanzo ya purple. ³Viitsa wayaa naali nivasikinyila nukhumuvolela ndi, " eeh, mwami wavayaudi!" lwavamala khusikinyila ndio vamenya nivamulivila nishivavi. ⁴Nalwo lwa Pilato yakalukha ilwanyi navavolela ari, "Loli, Mulerela ilwanya wamu iyi. khumumenye muri inzi shindolakhu makoso koosi khuye tawe." ⁵Yesu yiitsa ilwanyi, nafwaali ingara yamavwa khumurwi kwekwe ni ikanzo ya purple khumbili khwekhwe. Pilato yamanya navavolela ari, " henzi inu, mundu watsana uyu!" ⁶Lwavasalisi vakali halala navakhongo valola Yesu, valila mwikulu nivavola vari, " muvambi, muvambi!" ⁷Vayaudi vamenya nivamuchipa vari, " Khutsi khunamalako, nukhulondokhana khumalako keneyako, atushili khukhutsa shichila avoola yee numwana wa Nyasaye." ⁸Lwa Pilato yahulila makhuva yaka, yaali nilichenya likali muno, ⁹manakalukha mushikhalo shiavakhongo vilitaala vakanilanga, manareva Yesu ari, " Ive urula hena?" nikhali Yesu yahonjela navula khumuha lichipu. ¹⁰Nalwo lwa Pilato yamanya namureva ari, " Ive shulekeya khwiinzi ni? wamanyakhu uri, ndinuvunyali vukhukhulakuula, nende vukhukhuvamba ni?" ¹¹Yesu yamuchipa namuvolela ari, " Ive shuulikhu nuvunyali vwoosi khwiinzi tawe, nuvukhalikhu vunyali vwawahelwa khurula ikulu. khulwa yako, mundu yambaana khwiive anuvwooni vukali muno." ¹²Lwa Pilato yahulila lichipu lineyili, yachelitsa khumulakhula, nikhali vayaudi valila mwikulu nivavoola vari, " Nulakhuuli mundu uyu, shulikhu mulina wa Kaisari tawe. Mundu wosi yilomba khuva mwami alomalomanga vutamanu khu Kaisari." ¹³Lwa Pilato yahulila makhuva keneyako, yalera Yesu ilwanyi maniyikhala khushisoko shilikhalachila shili havundu havalanganga "khachila," nikhali mululomaloma lwavaaramia, valanga vari " Gabbatha." ¹⁴Liali litukhu liukhwirechekha khu Ipasaka, himbi isaa ikhola sita. Pilato yamanya navolela Vayaudi ndi, "Loli, mwami wenyu uyu!" ¹⁵Valila mwikulu nivavoola vari, murulitsiho, murulitsiho; muvambe!" ¹⁶Nalwo lwa Pilato yahana Yesu mumikhono chiavayahudi vamuvambe. ¹⁷Nalwo lwavamenya nivukula Yesu, nivatsia neye khulwany, nachingi musalaba kwekwe mwene, nivatsia havundu alangwangwa, " Havundu huvihang'a," mululomaloma lwavaaramia alangwangwa "Golgotsa." ¹⁸Iwene eyo naho wavaambila Yesu halala navasatsa vaandi vavili, mulala khuluveka lumukhono mulunji, nuwundi iluveka lumukhono mukaata, Yesu neye yava hakari wavo. ¹⁹Pilato yahandika shimanyilu navikha khumusalaba kwa yesu. shimanyilu shiene yesho vaali vahandikikhu vari: YESU WANAZARETI, MWAMI WAVAYAUDI. ²⁰Vayaudi vanyishi vasoma shimanyilu yishi, shichila havundu ha Yesu yaali navambilwi yaali himbi nilitaala likali. Shimanyilu shiene yesho shimenya shiahandikwa mululomaloma lwava aremia, mululalino nende mulukiriano. ²¹Nalwo lwamukali wavasalisi wavayaudi yavolela Pilato ari, " wakhaandika uri, Mwami wavayaudi tawe; nikhali andika uri, ' uyu yavoola ari," niinzi mwami wavayaudi." ²²Pilato yamuchipa namuvolela ari, "kambandike, mali khukahandika." ²³Nalwo lwavasikali vavamba Yesu, vavukuka tsinguvu tsietsie, nivakavana khuvandu vanne, shiamulala yanyoola indala indala; nende isulali. isulali yene eyo yaali nivula mushipi khurula ikulu. ²⁴vamenya nivavorana vari, " Khwakharandula tawe, nikhali khukhuvi isimbi, shichila neyo itsa khuvolela mundu anavukuli." Yaka koosi kikholekha, khu maandiko kavoola kari, " Vakavana tsikanzo tsianje, nivakhuvila tsinguvu tsianje isimbi." katushi khurweshitswa. ²⁵Hamusalaba kwa Yesu, khwliho, na mama wewe, numukhana wanga mama wewe, nende Meli mukhali wa Cleopa, halala nende Meli Magadalena. ²⁶Lwa yesu yalola mama wewe nende mweevhi wayaali niyayaanza nivasisinjiliho, yavolela mama wewe ndi, " Mukhali, lola mwana wowo!" ²⁷Ayavolela mweechi wewe ndi, " Lola mama wowo!" Khurula isaa yene eyo, mweechi yamuvukula namuila ingo wewe. mwene. ²⁸Keneyako nikakhavira, lwayaali niyakhamanya ndi amali mihinzi chiechie, khandi khu maandiko katushi khurweshitswa, Yesu yamenya navoola ari, "Mbulila vuluhu." ²⁹Mulongo kwaali nukwitsuuli ifini kwaali nukuli nimbi ahene yaho, vamenya nivavukula isiponji yiitsuli ifini indulu nivara khulusaala lwa hisopo manivachingula ikulu nivamulera mumunwa kwekwe. ³⁰Lwa yesu yaali niyakhangw'a ifini yene eyo, yavoola ari, " Luvweele." ³¹Yinaminyo murwi kwekwe hasi manakhutsa. ³²Shichila liali litukhu likhwirechekha, khandi mivili shichiali chiahulilwakhu khurikala khumusalaba litukhu lisabato tawe, [isabato yaali yamahana muno], Vayaudi vamenya nivareva Pilato ameneche vilenje viavaandu vaali nivavambilwi nukhuvarulitsa khumusalaba. ³³Nalwo lwavasikaali vamenya niviitsa nivameneka vilenje viumundu wukhuranga nivalonditsakhu wakhavili vaali nivavambilwi halala na Yesu. ³⁴Lwavatukha khu Yesu, vanyoola nakhutsi khale, khu, shivamenekanyinyakhu vilenje vievie tawe. ³⁵Nikhali, musikaali mulala yamenya namurotsa muluvalu lwelwe nishivavi, ma musaayi nende matsi niviranga khurula. ³⁶Mundu yalola vindu vieneyivi nivikholekhanga, yamala kuhana vushuhuda, na vushuhuda vwevwe nuvwakilikali. Yamanya ari kayavoola nikakilikali khu khali munyi mutushi khusuvila. ³⁷Vindu yivi viakholekha khu, maandiko kavoola kari, "shivulakhuho shikumba shiitsa khumekha khu mmbili kwekwe tawe," katushi khurweshitswa. ³⁸Khandi, maandiko kandi kavolanga kari, " valakhava mundu wavarotsa oyo." ³⁹Lwavindu yivi viosi viali niviakhikholekha, Yesefu wa arimathea, naali mulala khuveechi va Yesu[yaali mweechi wa Yesu wumusili shichila yaali yaria vayaudi], yareva Pilato amuhuchili, avukuli mmbili kwa Yesu. Pilato yamenya namuhuchilila. nalwo lwa Yosefu mwene oyo yamenya niitsa, nachinga mmbili kwa Yesu natsia nakwo. ⁴⁰Nikotemasi yaali niyitsilenje yesu vutukhu, yamenya niitsa wa mmbili kwa Yesu kwaali nukuli. yamenya nalera makure kavatsukanyinyimu [myrrh] nende linakha, kanyeke khutukha tsilita mia moja. ⁴¹Vamenya nivavukula mmbili kwa Yesu nivakuvohela mutsinguvu tsiavaali nivavishimu marashi, kweneyoko nakwa kwaali mwiima kwavayaudi kukhura mivili. ⁴²Havundu havaali nivavaambili Yesu khwaliho nimisaala chimatunda nichiarakwaho; mumisaala mweneyomo kwalimu nishilindwa shiyia, shishili khulerwakhumu mundu wosi tawe. ⁴³Shichila liali litukhu liavayahudi khwirechekha, makhandi shichila shilindwa shiali himbi muno; nashio shivaramu Yesu.

¹Litikhu likhuranga lilisitsa, Mariya magadalena yashivila khushilindwa, shivala nishishimwami, nanyoola lichina liakhunikha khushilindwa nilirulikhu. ²Yamenya niyilikhoka vwangu khulola Simon Peter nende veechi vandi va Yesu yayanza, navavavolela ari, vavukuuli Mwami khurula mushilindwa, mashukhumenyikhu wavamuhili tawe. ³Nalwo lwa Peter nende mwechi wundi varula nivatsia khushilindwa. ⁴Vilukhaka halala vosi nivatsia vwangu imbela wa Peter nivava vukhuranga khutukha khushilindwa. ⁵Nalwo lwayinama hasi, nahenzera mushilindwa, nalola ninguvu tsindavu nitsilinjilwi, nikhali shiyinjilakhu mukari tawe. ⁶Simon peter yamenya natukha lwinyuma, manatsia khushilindwa. yalola tsinguvu tsindavu nitsilinjilwi. ⁷Halala nitsinguvu tsiavaali nivamuvoyi khumurwi kwekkwe. shitsiali nitsilinjilwi halala nitsinguvu tsindavu tawe, nikhali tsiali tsilinjilwi havundu hundi lukanu. ⁸Nalwo lwa mwechi wundi, yaali naranjilili khutukha hashilindwa, yinjila mukari, nalola manasuvila. ⁹Shichila khutukha isaa yeneyo waali nivashili khumenya maandiko kavoolanga kari, kenyekha yisimushi khurula mulikhutsa. ¹⁰Nalwo lwa veechi vamenya nivakalukha mutsingo tsiavo. ¹¹Nikhali meli yaali nasinjili hashilindwa niyikhulanga. Lwayaali nashikhuulanga, yinama hasi nahenzelela mushilindwa. ¹²Yalola Tsinjelosi tsivili nitsivwali tsinguvu tsindavu nitsiikhaale, injelosi indala yaali niyikhaale hamurwi niyindi niyikhaale havilenje wumbili kwa Yezu kwali nukurelelwi. ¹³Vamenya nivamureva vari, "Mukhali, ulilila shina?" Neye yamenya navachipa ari, "ndiila kachila vavukuli Mwami waanje, ma niinzi shimanyikhu wavamuhili tawe." ¹⁴Lwayaali niyakhamala khuvoola ario, yishevuka manalola Yesu nasinjili haeneyaho, nikhali shiyaali namenyikhu ndi ni Yesu tawe. ¹⁵Yesu yamenya namureva ari, "Mukhali, kachila shina wikhulanga? ukhava viina?" Yakanakananga ari numulimi, nalwo lwayamuvolela ari. "Mukhongo, naali ive umuvukuuli, mbolela wumuvishi, nzi khumuvukula." ¹⁶Yesu yamenya namureva ari, "Meli." Yishevukha namuvolela ari mululomaloma lwavaaramiki ndi, "Rabboni" [Khuvoola "Mwechitsi"] ¹⁷Yesu yamenya namuvolela ari, "Wakhangumilakhu tawe, shichila shili khutsia mwikulu wa Tata, nikhali tsia khuvamwavo waanje uvavolele uri natsia mwikulu wa Tata waanje nende wa Tata wenyu, khandi natsia wanyasaye wanje nende wa Nyasaye wednyu." ¹⁸Mariya magatalena yiitsa navolela veechi ari, "Ndoli mwami," ma umbolele makhuva yaka koosi. ¹⁹Litikhu lineyelo halukolova, nalio nilili litukhu liukhuranga khwisitsa, waveechi niviikalilwi nivaali nuvurii shichila vayahudi, Yesu yiinjilamu nasinjila hakari havo navavolela ari, "Milembe chive namunyi." ²⁰Lwayaali niyavavolela ario, yavamenyinya mikhono chiechie nitsimbalu tsietsie. veechi vitsula vuyaanza lwavalola Mwami. ²¹Khandi Yesu yamenya navavolela ari, "Milembe chive namunyi. khuli lwa Tata yanduma khunyi, nindio khandi yinzi varumanga." ²²Lwa Yesu yaali niyakhavavolela ario, yavesesela miuya navavolela ari, "nyooli roho mutakatifu. ²³Mundu wosi wamutsitsa khuvehela vwooni vwavo, valavehelwa; na mundu woosi wanumuvuli khuvehela vwoni vwavo, shiatsitsa khuvehelwa tawe." ²⁴Tomasi, mulala khuvaali kumi na mbili, nalangwa lira lindi Didymus, shiyaali navo tawe lwa Yesu yaali niyitsi. ²⁵Veechi vaandi vamenya nivamuvolela vari, "khuloli Mwami." yavahinganyinya navavolela ari, "Nishili khulola tsimbala tsimisumali tsili mumikhono chiechie, mandilitse shitere shianje mutsimbala tsimisumali chieneyecho, khandi mamukumili mutsimbalu, shinzitsa khusuvilakhu tawe." ²⁶matukhu munane nikakhatukha vechi vavukana khandi na Tomasi yali navo yesu yitsa muliango nukufunji nasinjila hakari havo, navola milembe khu munyi. ²⁷yamanyala nalanga Tomasi namuvolela kumila khu mikhono chianje tila mu tsimbala khandi mutsimbalu mausuvili. ²⁸Tomasi yamuchipa namuvolela ari, "Mwami waanje khandi Nyasaye waanje." ²⁹Yesu yamenya namuvolela ari, "Usuvili vutswa kachila undoli. Vali nuvukasu yavo vashili khondolakhu, navo vasuvila." ³⁰Yesu yamenya nakhola vilolishitso vinyishi mutsimoni tsia veechi veve, vilolishitso vieneyevo shivihandikwakhu mushitabu shinu tawe, ³¹nikhali kanu kaandikwa khu utushi khusuvila uri Yesu ni Kristo, neye naali mwana wa Nyasaye, khandi khu, khuvirila mulisuvila liolio utushi khunyoola vulamu mulira lielie.

¹Lwayaali niyakhamala keneyako koosi, Yesu yimanyinya mwene khandi khuvechi lwavaali khu inyanza ya Tiberia. yimenya ari mwene: ²Simoni peter yaali halala na Tomasi wavalalanga lira lindi Dimasi, Nathanieli warula mulitaala lia cana lili mushivala shia Galilaya, na vana va zebedayo halala na veechi va Yesu vaandi vavili. ³Simoni Petro yamenya navavolela ari, "inzi nzitsa khuluva." navo vamenya nivamuchipa vari "khali khutsi khutsitsa nive khuluva." vamenya nivatsia voosi halala manivanina muliara, nikhali, mbutukhu vweneyovo vwosi shivaluvakhu isutsi yosi khali indala yene tawe. ⁴Navutswa, lwa asubuyi yatukha, Yesu yasinjila khuluchinga, nikhali veechi veve vamumenyishitsakhu tawe. ⁵Nalwo lwa Yesu yamenya navareva ari, "Vavukha, mukhu nishindu shiosi shiukhulia?" navo vamenya nimukeya vari, "khuvula." ⁶Nalwo lwayavavolela ari, "siuvi ineti yenyu khumukhono mulunji kwi imeli, nu mulanyolakhu." vamenya nivasiuva yavo khuli lwa Yesu yaali navavolele manivakhayilwa khuchikhwesa khurula mumatsi shichila ineti yeneyo yaali ikumili tsinyishi muno. ⁷Nalwo lwa mwechi wa Yesu yaali niyayanza yavolela peter ari, "nu mwami." Lwa simon peter yahulila ari nu mwami, yanavula inguvu yeye yilwanyani namufuala [shichila yaali shiekenyie], naruma munyanza. ⁸Veechi veshie vamenya niviitsa nivali muliara [shichila shivaalikhu ihale nililova tawe, yaani vwaali vurambi vwitsiyadi tsimia tsivili] navo vaali nivakhwesesa ineti yaali niyitsuli tsisutsi. ⁹Lwavaali nivaqkhatukha khulilova, valola makaa kumulil haeneyaho, tsisutsi nitsirelelwikhu ikulu, ntsili numukati. ¹⁰Yesu yamenya navavolela ari, "lerikhu tsisutsi tsiamuruli khuluva lweneyulu." ¹¹Simon peter yatsia nakhwesesa ineti yaali niyitsuli tsisutsi tsingali muno, tsiali tsisutsi 153 nachilera khuluchinga, nikhali, khali niiva tsisutsi tsieneyetso tsiali tsinyishi, tsiarandulakhu ineti tawe. ¹²Yesu yavavolela ari, "hambi muli shikhuli shiamavwevwe." avulakhuho mwechi wosi

yamureva ari, "Nive ulivina?" shichila vaali vamenyi khale ndi nu Mwami. ¹³Yesu yiitsa navukula mukati, nitsisutsi navakavanyila. ¹⁴Yulu lwaali lukhola khavaka Yesu nimenyinya mwene khuveechi veve lwayaali niyakhisimukha khurula mulikhutsa. ¹⁵Lwavaali nivakhamala khulia shikhulia shiamavwevwe, Yesu yareva Simon Peter ari, "Simon mwana wa Yohana, wanyanza khuvira vindu yivi viosi?" Peter yamuchipa namuwolela ari, eeh Mwami, ive wamenya uri nakhuyaanza." Yesu yamenya namuwolela ari, "Lishitsa vimeme vianje." ¹⁶Yamenya namureva khandi lwakhavili ari, "Simon Peter mwana wa Yohana, wanyaanza ni?" Peter yamuchipa namuwolela ari, eeh Mwami, ive wamenya ndi nakhuyaanza." Yesu yamenya namuwolela ari, liinda makondi kaanje. ¹⁷khandi yamureva lwakhavaka ari, "Simona Peter mwana waYohana, wanyaanza?" Peter yamenya nava nilichenya mumwoyo kwekwe shichila yesu yaali umurevi makhavi kavaka, ndi" wanyanza?" yamenya namuchipa ari, " Mwami, ive wamanya vindu viosi, wamanya uri nakhuyaanza." Yesu yamuchipa namuwolela ari, "Lishitsa makondi kaanje. ¹⁸Kakilikali, kakilikali khuvolelanga, lwa waali nushili mutiti, wifwalanga nukhutsia havundu wosi wawenyanga, nikhali nuwakhamala khusakhula, walunjishitsa mikhono chiochio, mahundi mundu aliitsa khufwala nu khuchinga nukhukuhila havundu hukhenyikhu khutsia tawe. ¹⁹Yesu yalomaloma makhuva yaka khumenyinya Peter ndi, nilikhutsa shina lia yiitsa ahelelemu Nyasaye luyali. Lwa yaali niyakhamala khulomaloma makhuva yaka, yavolela Peter ari, "Noonda." ²⁰Peter yishevukha manalola mweechi wa Yesu yaali niyayaanza mbirira navalondanga, mweechi mwenoyo neye yaali namukhumbelelenje lwavaali nivalitsa shikhulia shivo shia halukolova, khandi neye yaali niyakhamurevanga ari, " Mwami, Nivina atsitsa khu tsama?" ²¹Peter yamulola nareva Yesu ari, "Mwami numusatsa uyu nakhole arina?" ²²Yesu menya namureva ari, Ninenyi atsilili khumenya khutukha lwanilikalukha, kasumbulila shina? Ive noonda." ²³Makhuva yaka kalandalitswa havundu wosi ndi mweechi oyo yiitsa akhutsikhu tawe. Nikhali yavolakhu Peter ndi mweechi wundi oyo yiitsa akhutsikhu tawe, nikhali, yavoola ari "Niiva nyala khwenya atsilili khumenya khutukha lwanilikalukha, kakhusumbulila shina?" ²⁴Uyu neye mweechi yahana vushuhuda khulondakhana khumakhuva yaka, khandi neye yaandika makhuva keneyaka, makhwamenya khuri vushuhuda vwevwe nuvwakilikali. ²⁵Khuliho nivinduvindi vinyishi via Yesu yakhola. Nikhali khuva nukhwaandika vuli shindu hasi, shimbaara niiva khwakhaveele nuvwiaangu mushivala munu mukhuvikha vitabu vikhwakhandikimu tawe.